

東
華
續
錄

東華續錄

咸豐十八

臣王先謙敬編

臣陶澐宣恭校

十一月丁未朔日食○以穆蔭爲內閣學士○戊申諭內閣陸建瀛奏遵旨保舉營員請將辦理洋匪出力之勇頭以守備補用等語江蘇勇頭方翔辦理浙洋盜匪尙屬出力茲據該督奏稱方翔於外海內江風水並槍礮等技俱能講求著准其遇有江南外海水師守備缺出卽行補用見在江西籌辦防堵事宜著卽飭令該員前赴江西交張芾差遣委用○諭陸建瀛楊文定奏江蘇賑濟漕米一律截卸完竣陸續散放一摺江蘇豐沛等州縣被水災民前經降旨截留南糧三十萬石賑濟並派布政使祁宿藻專司查辦見據奏稱應行截留之湖南江西各幫漕米業已截卸完竣由

該藩司查照奏定章程陸續設廠開放統計豐沛銅山陽山邳州等五州縣派撥米數於應賑戶口通融撥補尙餘米七千餘石著卽妥爲收存畱作明春接濟之用其宿遷等六州縣派撥米石並著該藩司督飭趕緊散放實力稽查見在豐北開工各屬災民除按月給賑外兼可赴工謀生據奏民情安帖災黎無虞失所稍紓朕念所有江廣幫船除在江南卸載者已由該督派員押令回空外至載卸山東賑米各船及接剝運通之江安湖北江西等幫昨已有旨嚴催一俟剝船起卸卽著漕運總督沿途各督撫迅卽督押回空南下不准片刻停畱以期無誤新漕毋得藉詞延宕致干咎戾懷之○撥江南漕標左營都司守備千總各一員把總三員外委四員額外外委三員兵丁二百六十四名移駐邳州原隸河標右營之邳汛千總把總外委各一員額外外委三員兵丁九十

三名併歸該營爲邳州營隸徐州鎮轄○己酉諭內閣通政使羅
惇衍奏一月之中日月並食請嚴飭廷臣實力修省以回天變並
請停止冬至慶賀等語日月薄蝕躔度固有定數然自古帝王皆
因此而深戒懼我朝 列聖每因災異特降諭旨戒飭羣臣共圖
修省蓋以 上蒼垂象必當君臣交儆克謹 天戒並非博側身
修行之名載之史冊也見在盜賊未平河決未堵國用未足民困
未蘇總由朕用人行政多有缺失適見於 天敢不自省所有本
年冬至升殿受賀典禮著卽停止至內外大小臣工各有職守近
來因循推諉積習頗深疊經降旨申誡其感奮有爲者固不乏人
而陽奉陰違甚至揣摩迎合者亦復不少是以朕於秋仲經筵以
有言逆於汝心必求諸道有言遜於汝志必求諸非道命題特宣
御諭昭示臣工朕兢業寸衷幾康自敕原不求中外共喻而諸臣

事上之心爲實爲名亦難逃朕鑒嗣後惟期共矢公忠力除積習
洗心滌慮以佐朕躬斯卽應 天以實不以文之意也將此通諭
知之○羅繞典張亮基駱秉章鮑起豹奏賊踞省河東西恃有浮
橋來往出沒詭譎無常節經我兵圍剿疊次將橋拆斷斷其接濟
賊勢日窮惟恃地洞可避槍礮計圖陷城臣等恐賊窮思竄豫先
知會向榮和春等將各營追兵派定並飭將弁兵勇無分晝夜不
准擅離隊口十八日黎明兵勇正在掘濠賊因舊穴斜穿一洞忽
將南城轟塌一段寬至八丈有餘賊眾蠢擁上撲時副將瞿騰龍
等督率兵勇爭先堵擊乘勢搶下缺口追擊斃賊三百餘人賊因
三次轟城大挫黨夥精銳半已死傷其逃過河西賊營者又經朱
啟仁張國樑水陸並剿皆有斬獲十九夜該匪因追剿緊急乘風
雨黑暗河東賊偷渡西岸皆由小路翻山越嶺四散紛逃臣等伏

思賊情詭秘或暗伏山僻掣動我兵追去仍撲省城或由山徑上下分馳使追兵無可蹤迹河西道路歧出上下皆可竄逃旋據探報賊已由白箬鋪逃去白箬距甯鄉縣城僅五十里且有小路可以繞往湘鄉當卽飛咨署督臣徐廣縉急籌策應兜剿省門見無賊匪上諭逆匪擾撲長沙省城屢被我軍痛剿黨夥死傷殆盡其逃散餘眾勢益窮蹙著徐廣縉羅繞典張亮基督飭各路將弁兵勇迅速兜截合力追剿務期掃蕩賊氛毋畱餘孽此次省城防守八十餘日該督撫等統率各員弁晝夜嚴防內外夾擊疊挫賊鋒保衛城垣居民藉得安堵辦理尙無貽誤羅繞典著交部從優議敘張亮基著交部議敘賂秉章鮑起豹前因賊匪竄入楚境屢陷城池本有應得處分此次省城防守功過尙足相抵著加恩免其議處所有在事文武員弁紳民人等著徐廣縉會同羅繞典張

亮基擇其尤爲出力者秉公酌保候朕施恩毋許冒濫○諭軍機大臣等逆匪分踞長沙省河東西八十餘日疊經我兵攻剿斷其接濟散其黨與勢已窮蹙前後三次轟城均被我兵擊敗兇悍黨夥半已死傷其逃過河西賊營者復因追剿緊急皆由小路翻山四散紛逃沿途被張國樑朱啟仁張東价及鄉團唐秩臣等燒毀賊營並在見家河猴子石龍回塘謝家橋郭思橋等處截殺各路官兵追至白簪鋪地方殺賊一千餘名生擒二百餘名並將僞翼王殲斃見在賊由甯鄉白簪鋪逃去此地距縣城僅五十里有小路可達湘鄉常德岳州荊州一帶隨處皆可竄越若不嚴行追捕聽其一路裹脅必致餘灰復燃又成巨患著徐廣縉飛飭各鎮將分帶兵勇星速攔追乘其紛紛竄潰之時痛加剿洗速蕆大功至省城防兵仍應安設著羅繞典張亮基鮑起豹等督飭在事文武

官紳加意巡防毋稍鬆懈殲斃之僞翼王係何姓名逆首洪秀泉等是否擊斃抑逃竄何處均著查明具奏將此由六百里諭知徐廣縉並諭令羅繞典張亮基鮑起豹知之○召前任湖南巡撫駱秉章來京○辛亥諭軍機大臣等寄諭廣西巡撫勞崇光據孫鏘鳴片奏沿途情形內稱南甯之宣化土匪頻出滋擾永淳橫州客民僮民爭田起釁糾眾仇殺不休潯州之貴縣鬱林之興業各有勦散餘匪正在搜捕容藤交界之自良墟蓮魚灣土匪盤踞該地邀截客商按船抽稅等語前據該撫奏各路勦匪情形除鬱林等屬業已肅清如容縣之自良墟等處尙多伏莽著按照該撫前奏並該學政所指確查土匪蹤迹迅速勦辦務使一律肅清毋致稍畱餘孽以靖地方將此諭令知之○壬子諭內閣嗣後遇朕臨幸瀛臺如進淑清院門御前大臣御前侍衛等俱在淑清門下馬如

進德昌門御前大臣御前侍衛等俱在橋東下馬乾清門大臣侍衛等仍著照常步行跟隨○徐廣縉奏賊於十月十八十九等日力撲長沙省垣牽掣東路之兵潛於十九日夜乘風雨昏暗全股過河金牛嶺一帶翻山逃竄福興等在象鼻壩營盤聞信卽督帶兵勇由小路過河追至牛頭山截擊獲勝賊匪四散向榮駐紮北岸亦卽派總兵馬龍等追剿至安樂鋪見賊尙有三千人卽督率兵勇奮力直前斃賊不少該逆且戰且走我兵卽於安樂鋪紮住向榮亦於是日夜趕到探得逆匪已至甯鄉據獲犯供稱有欲往常德者有欲往寶慶者臣等查匪徒旣至甯鄉非南竄寶慶卽北竄常德必須趕緊兜圍遏其奔突福興等兵力尙單揀派和春秦定三李瑞王錦繡四鎮之兵及瞿騰龍所帶鎮筸勁旅計五千餘名趕上福興等營盤合力前進兵力已厚足資追剿又另派知

府江忠源督帶兵勇二千名趕赴湘鄉截其竄竇慶之路至北竄常德惟益陽最爲扼要已飛飭向榮由甯鄉設法鈔前堵截並派知府朱啟仁管帶潮勇四千名總兵常祿帶兵千七百名及張國樑捷勇四千名馳往長沙西北一帶攔截遏其竄往湘陰伏查匪徒此次竄逃實因鹽米將盡且見大兵圍逼漸緊勢窮力竭鋌而走險竄出後經官兵剿殺其氣已衰卡惟有嚴督在事文武趕緊剿辦不敢稍涉遷延又查竄出之路與向榮福興所紮營盤均不甚遠該提督等不能嚴密防堵咎有攸歸未便因其追剿獲勝稍事姑容相應請旨交部議處以示薄懲 上諭此次逆匪因大兵圍剿米鹽將盡紛紛竄逃經各路兵勇及各團義勇四面攔追截擊斬擒甚多勢已窮蹙該大臣分派將弁迅速堵扼兵力亦不爲不厚該逆卽冒死衝突料難他竄惟當嚴督在事文武趕緊兜剿

務將著名逆首及從逆匪犯悉數殲擒不准仍前竄逸致干重咎仍隨時知照廣西湖北一體嚴防堵截勿令餘匪竄入至福興向榮所紮營盤距賊竄出之路不遠該提督等不能嚴密堵防未便因其追剿獲勝稍事姑容福興著交部議處向榮係革職發遣戴罪自效之員著該大臣存記如果追剿得力據實具奏儻始終不能奮勉一併嚴參重治其罪○四川學政何紹基奏請鑄用大錢以復古救時並禁止民用銅器得旨所奏不爲無見然小錢大錢制雖異用實同見鑄小錢銅尙不足何況大錢乎汝知一未知二也至器用多銅原干例禁本年曾經降旨況古制亦非盡善舉一事必欲復古試問井田封建尙可復乎此摺著戶部存記若有可行時不妨採擇入奏○癸丑晉封 英貴人伊爾根覺羅氏爲英殯 雲貴人武佳氏爲 雲嬪○甲寅諭內閣黃宗漢奏浙江

新漕試行海運請飭江蘇委員幫同辦理一摺來年浙漕海運係
屬辦始豫雇船隻最爲緊要除由該省自雇北運商船外其不敷
船隻應由上海添雇著兩江總督江蘇巡撫派委妥員幫同辦理
所有江蘇浙江海運事宜並著該督等責成按察使倪良燿總司
其事以資熟手總期不分畛域妥速籌辦毋稍延誤○諭穆騰額
奏委員查辦打旺寺喇嘛互鬪一案完結一摺此案辦理乖謬釀
成巨案之班墊曲丕著革去商卓特巴並仔仲父諾們罕名號奏
明懲辦仍著查拏在逃之協饒札巴務獲照例治罪○諭軍機大
臣等穆騰額奏委辦乍丫夷務之噶布倫豫籌辦理情形一摺前
因乍丫小喇嘛復起釁滋事經穆騰額派委噶布倫策墊等前往
查辦當諭令該大臣飭令該委員等妥慎辦理茲據奏稱噶布倫
策墊查照成案請於打箭鑪辦買茶葉並支領銀兩在藏購買各

項賞需帶往俾辦理不致掣肘等語著裕瑞穆騰額迅卽籌備應用飭令噶布倫策墊會同各委員傳集兩造嚴切曉諭務令照舊相安支應差使儻小喇嘛桀驁不遵卽仍遵前旨懾以軍威鎮靜彈壓毋致別生事端以綏邊境至廓爾喀貢使見在經過道路有無阻滯何時可以到京著一併查明具奏將此各諭令知之○乙卯修築湖北襄陽老龍官隄及公安鍾祥天門江陵石首潛江六縣被水衝缺民隄○丁巳冬至祀天於圓丘○調任湖北巡撫常大瀛署湖北提督雙福奏_臣等先據探報賊自長沙逃竄後擾及甯鄉益陽一帶十一月初三日復接岳州府知府廉昌稟賊由益陽分股竄至湘陰縣林子口離岳郡百餘里已稟署督_臣徐廣緒等撥兵赴岳堵剿又據湖北派在湘陰縣土星港卡之知縣李嘉瑞疊次稟報賊於十月二十六日屯住林子口是夜有船三

隻由蘆林潭下竄經該員與紳士吳士邁督帶漁勇沿河追捕開
放槍礮賊船始行竄回復探得賊先在益陽搶擄糧食擄船甚多
因林子口設立水卡不能卽下二十八日該匪帶數千脅逼民人
幫拆河內卡椿勢將直趨岳州該員與吳士邁因土星港守卡兵
勇止有二千名寡不敵眾見復趕派水卡會齊船勇水師併力堵
禦暨派湖中漁勇準備礮械等情臣等查前次募備洞庭湖中漁
勇二千餘名在洞庭湖口土星港林子口等處設卡駐守以期遏
賊水路要隘今賊匪大股竄至林子口雖經委員紳士督率漁勇
暫得攔住見在添勇合力堵擊深虞賊眾我寡且卽水路阻遏又
難保不由陸路奔突儻至岳郡則連壤之湖北荊州武昌二省皆
形喫重擇要分設兵勇無多實不足恃以制勝亟應添兵趕赴岳
郡協助水陸兜剿早爲殲除臣等駐湖北武昌相去岳郡湖口六

百餘里該處距長沙百餘里尙屬切近計南省督撫諸臣此時均已派兵來岳策應臣等惟恐稽遲復行飛咨署督臣及湖南撫臣等迅卽籌撥多兵赴岳辦理並咨將軍台湧提臣博勒恭武暨飭本省各路防所一體加緊嚴備至武昌省城重地凡修理城垣儲備軍需設礮安營等事均經臣等陸續辦理督同官紳訓練兵勇以備戰守惟前次所調本省及皖豫兩省之兵除派防外此時省城內外存兵僅止二千餘名不敷調遣其前調之陝甘官兵三千名計月內陸續可抵楚省擬俟到時分別畱衛省城及察看賊蹤調派征剿又奏據委防蒲圻口隘知縣張開霽探稟賊匪大股已於十一月初三日竄入岳州府城並准提臣博勒恭武咨稱初三日未刻探悉賊離城僅三十里當帶兵八百餘名迎剿行至五里排遇賊約二千人我兵開放槍礮斃匪無數官兵亦有損折不料

東門火起復有賊匪馬步齊出從後鈔襲我兵腹背受敵不能抵禦以致潰散該提督因馬中槍跌地腰胯受傷此時官兵營盤盡被燒燬不能安紮應撤回省臣等查岳郡爲湖北武昌荊州二府水陸屏障被賊竄入所有湖北邊界各要隘前駐兵勇三五百名更不足恃以堵截其水路已出湖口江面寬廣雖沿岸均設有兵礮仍恐順流直下難資堵禦見在省城內外存兵止及二千名陝甘官兵僅到四百餘名其餘二千數百名尙未據報入境情形甚爲緊急卽飛咨徐廣縉速派大兵趕於捷徑繞出賊前馳來武昌援剿臣等已督率官紳兵勇將守衛一切事宜星夜嚴備惟盼南省大兵速到俾得迅殲醜類敕靜地方上諭軍機大臣等據常大清雙福先後馳奏逆匪竄入岳州府城失守湖北情形緊急各一摺覽奏曷勝憤悶逆匪竄入湖南節經降旨諭令該督撫等派

委提督博勒恭武帶兵駐紮岳州專司防堵乃於十一月初三日賊匪大股由湘陰縣渡過東岸竄至巴陵縣地方博勒恭武帶兵迎擊旋即東門火起賊匪馬步從後鈔出我兵腹背受敵不能抵禦營盤盡被焚燬以致潰散府城失守是顯有匪徒溷入岳城爲賊內應該城文武防禦日久何以毫無覺察殊堪痛恨岳州以北尙有蒲圻嘉魚咸甯等縣何以不擇要堵截遽稱撤兵回省竟全然置之不顧邠前次賊竄甯鄉據徐廣縉奏稱派和春秦定三李瑞王錦繡四鎮及瞿騰龍等各帶勁兵與福興向榮等合力追剿何以任賊肆竄並據稱令向榮設法鈔前堵截另派朱啟仁常祿張國樑等各帶重兵遏其竄往湘陰之路何以此次賊匪徑由湘陰縣屬竄入岳州且府城文武何以全無準備致賊匪如入無人之境種種情形殊不可解徐廣縉自粵赴楚業已遲延及到湘潭

正賊匪窮蹙圖竄之時屢接奏報亦知杜賊竄路爲最要關鍵何以亦蹈從前覆轍卽此時賊踞岳州是否分股北擾蒲圻以北水陸要隘如何堵截著該大臣迅卽統帶大兵親往岳州一帶嚴督各提鎮將等設法繞出賊前併力兜剿斷不得再任奔突常大瀄雙福駐紮武昌防護省城及境內水陸緊要地方與台湧分飭文武嚴密防堵徐廣縉仍當設法派兵接應朕連日望報甚殷該大臣想已續有奏報在途以後軍情務須隨時由六百里馳奏以慰朕懷提督博勒恭武受傷是否屬實何以任兵潰散著先行革職仍著查明據實具奏岳州府城文武下落一併查明奏聞湖南省城見有張亮基鮑起豹駐守羅繞典著暫畱湖南若有應行帶兵堵剿之處著該大臣等酌量籌辦毋誤事機蘇布通阿帶兵見在何處務須扼要調撥此次賊竄究係何路失防致令復肆猖獗著

徐廣縉確查嚴辦毋稍姑息朕細察湖南軍營積習總由帶兵大員不能豫出賊前迎頭兜剿或設伏要隘攔腰截擊其在後追剿之兵又不肯跟蹤緊躡卽如徐廣縉前奏內向榮於追賊喫緊之時又以兵單爲詞俟調省城兵到隨後尾追此等舉動安能不失機會邪該大臣統領大軍責無旁貸南北兩省皆所統轄見在賊已竄踞岳州咽喉要路爲其所扼軍餉銀兩何路繞越荊州防兵亦單武昌城守尤要該大臣應於何處駐紮調度必當全盤籌畫勿致顧此失彼陝甘續調之兵迅速催令趕到兵貴神速當此萬分喫緊之際若不就見在兵將相機調遣卽再調遠兵亦緩不濟急朕宵旰焦勞省躬滋懼該大臣等同膺委任當如何盡心竭力爲朕分憂也將此由六百里加緊諭知徐廣縉並諭令羅繞典張亮基鮑起豹雙福台湧知之○賞八旗兵丁一月錢糧○戊午諭

軍機大臣等昨據常大瀆奏逆匪竄入岳州已由六百里加緊諭令徐廣縉迅統大兵親往督剿岳州爲北省屏障最關緊要前於九月間因博勒恭武在岳州防堵兵力尙單且未知能否得力屢次諭令徐廣縉等速派精兵數千赴岳扼要嚴防卽該大臣前奏亦因岳州緊要請將續調之兵分駐防堵嗣後常大瀆博勒恭武先後奏報查辦臨湘土匪情形恐其南竄與長沙大夥勾結復降旨令徐廣縉等速派精兵前往南北要隘合力防剿原以防守岳州爲第一要務朕早料賊匪詭詐必由此路北竄卽該大臣亦見及此何以此次賊匪竄入岳境竟無湖南派往官兵與博勒恭武會同夾擊且博勒恭武係湖北提督越境防守該督撫等何以不早派得力鎮將協同防守本日據御史王茂蔭奏湖南督撫大員並不以岳州爲意且以湖北提督駐守岳州爲多事足見該大臣

於奉到疊次諭旨漫不經心以致賊匪肆行無忌竟陷岳州該大臣前派朱啟仁常祿張國樑等分帶兵勇遏賊北竄湘陰之路統計八千餘人兵力不爲不厚若能鈔出賊前或跟蹤緊躡與博勒恭武前後夾擊卽不能埽數殲除賊匪亦當大受懲創何至逆裔復熾至岳州城內文武各官如果豫防奸細查拏嚴密何至有東門失火之變種種貽誤實堪痛恨見在逆匪是否全股占踞岳州逆首洪秀泉等是否在內有無餘匪他竄該大臣務當迅統大兵速赴岳州或間道繞至岳州北路趁此賊匪聚在一處設法圍攻斷不可稍延時日致賊分踞城外邨莊要隘或擄掠江面船隻分股四竄岳州東達武昌西達荊州均關緊要常大瀄雙福等見在湖北省城防堵本日已有旨令駱秉章畱於湖北幫同辦理台湧防守荊州兵力亦形單弱仍著該大臣速派勁兵及續調到陝甘

新兵酌量分赴武昌荊州協同守禦總以鎮撫人心爲要萬勿再有疏虞至漢口地方商賈輻輳爲大江南北咽喉尤賊匪垂涎之地必應設法防護且恐匪徒漏迹句串更須嚴密查拏奸細飭令地方官督率紳耆合力團練以資保衛岳州爲兩楚重地一旦失守該大臣督撫等自問當得何咎昨已據常大瀆奏到而湖南奏報今日尙未接閱不勝焦灼此後緊要軍情務須隨時馳報以慰懸念王茂蔭原摺並著鈔給閱看將此由六百里諭知徐廣縉並諭令羅繞典張亮基鮑起豹台湧常大瀆駱秉章雙福知之○以陸應穀署戶部右侍郎賞琦善三品頂帶署河南巡撫

已革陝甘總督

○

命前任湖南巡撫駱秉章開於武昌省城幫辦防堵事務○調陝甘兵二千名西安駐防兵一千名赴河南防剿○辛酉諭內閣戶部奏請飭催河南應豁節年民欠冊報一摺咸豐元年降旨豁免

各省節年民欠錢糧各該省均經奏到惟河南省至今尙未造報
屢經該部咨催仍以調驗冊串爲詞任意稽延且恐有以完作欠
希圖彌縫隱混情弊著署河南巡撫卽責成藩司鄭敦謹迅將
奏銷冊報節年民欠各項錢糧覆加確覈其應豁不應豁之處詳
細釐剔如有已徵未解之項勒令按數提清卽於奏請豁免單內
扣除仍趕緊於年內開單具奏毋許稍有含混藉詞延宕致滋弊
端○徐廣綰張亮基羅繞典駱秉章奏十月二十二日賊竄至甯
鄉城外向榮已於安樂鋪拔營追及賊卽排列抗拒我兵分三隊
進攻該匪勢不能支由城外小路竄往益陽一帶而去我軍於二
十三日追至蒼水鋪匪已搶得多船搭造浮橋渡河徑到益陽向
榮當卽率同總兵馬龍郭仁布緊追該匪分股回拒向榮令明安
泰等督隊進攻斃賊多名該匪退至河邊各屯紮我兵恐有埋

伏未敢再追而查看河內船隻數百號盡爲賊擄我兵無船可渡
各鎮追剿之軍一時不能繞出賊前查該匪旣已擄船則水路可
自龍陽至常德亦可自湘陰至岳州而岳州爲北省咽喉扼要之
地尤爲喫緊臣等一聞探報立即商派總兵常祿及都司張國樑
之兵趕赴湘陰堵截復另派總兵和春秦定三王錦繡李瑞督帶
大隊馳往岳州並飭令確探賊蹤攔頭迎擊向榮等追剿之軍於
二十五日齊抵甯家鋪趕緊於沿江尋覓木簕竹簕搭造浮橋以
便我軍過渡續據探報賊從益陽走藍溪欲往林子口逃竄向榮
卽派總兵郭仁布等統帶官兵從藍溪進剿二十六日郭仁布等
於五更出隊直抵藍溪該匪擁出四千人分數隊拒敵官兵迎
擊從辰至巳相持兩時許擊斃多名無如賊來愈眾勢難抵敵正
在喫緊之際適福興援兵趕到賊始敗入邨內拒守二十七日向

榮福興親率官兵五更出隊探得賊匪已於初更時全股逃竄並沿江擄船多隻分向西林港前竄當卽催兵前進沿路橋梁俱被該逆拆斷必須紮筏渡河以致兵行不能迅速二十八日由河岸跟追所走均田塍小路兵勇魚貫而行甚爲遲滯向榮恐誤進剿卽督率兵勇先由別路渡河繞出湘陰截擊而該匪前隊已於二十八日由林子口竄撲蘆林潭連夜竄往湘陰二十九日早至南門外對岸橋墩夾地面開放槍礮並放船隻過河該縣莊心庠正在營餉兵勇堵禦適常祿張國樑趕到當卽督飭兵勇沿河施放槍礮該匪見有援兵不敢拒敵退回原路向榮亦於十一月初一日行抵湘陰探得該匪前隊已在營田起程將船隻及重笨之物全行拋棄由陸路竄往歸義驛屯踞查歸義地面大路係往岳州小路可由平江竄出與湖北之通城崇陽蒲圻等處毗連該匪詭

謫異常偵知我兵趕赴岳州難保不由小路逃竄是以前派和春
秦定三等鈔截卽飭由大荆一路行走冀可鈔出賊前見又專派
提督蘇布通阿帶川兵專向平江一帶前進截其竄往北省之路
惟逆匪前在益陽有河可阻該縣並未將河面船隻全行收往僻
港以致匪得渡河進城擄掠實屬罪無可追相應請旨將益陽縣
知縣陳應台革職拏問訊明有無退避情形照例治罪再臣徐廣
縉已於初一日移紮長沙 上諭本月十一日據常大瀄等馳奏
逆匪於十一月初三日竄入岳州府城當降旨將博勒恭武先行
革職由六百里加緊諭令徐廣縉等迅速追截兜剿數日以來望
報甚殷乃本日據徐廣縉等五百里馳奏猶是十一月初一日以
前沿途追剿各情該大臣於本月初一日移營長沙此摺係初七
日奏報何以初三日岳州失守之事毫無見聞軍營偵探所司何

事據稱帶兵大員等於初一日已抵湘陰距岳州甚近豈前途失
事遲至數日尙無稟報耶覽奏憤悶殊不可解徐廣縉羅繞典張
亮基駱秉章均著先行交部議處岳州湘陰一帶乃南北兩省要
隘朕早料及賊匪窮蹙必由此路奔竄九月間屢降諭旨令該大
臣等派撥精兵前往協防卽徐廣縉前次奏報亦經派兵扼賊北
竄之路何以博勒恭武與賊接仗並無湖南追剿官兵前後夾擊
近日軍營積習賊來不擊賊去不追種種膽玩實堪痛恨若不嚴
申紀律何以整飭戎行著徐廣縉等遵照前旨查明賊由何路竄
越帶兵各員何人追剿不力僅係臨陣退縮坐視不援卽著一面
奏聞一面以軍法從事徐廣縉由粵赴楚本已遲延若不親督鎮
將就近調度任聽飾詞稟報貽誤事機自問當得何罪長沙省城
見有羅繞典張亮基與鮑起豹等防守徐廣縉著卽統帶大兵兼

程馳赴岳州一帶繞出賊前迎頭截擊提督善祿計已行抵湖北
著卽截留該省扼要駐紮幫同勦捕武昌漢陽荊州水陸各要隘
俱著分派精兵並新調到陝甘勁旅一律防堵毋任再有竄逸逆
匪前在益陽有河可阻該縣並不將船隻收往僻港以致匪得渡
河進城擄掠罪無可追益陽縣知縣陳應台著革職拏問治罪仍
查明岳州失事文武各員據實具奏○諭軍機大臣等本日徐廣
縉等奏到追勦逆匪情形並未將岳州失守奏報朕心實深焦灼
已明降諭旨將徐廣縉等先行交部議處以示薄懲矣逆匪竄至
安樂鋪地方據該大臣奏報不過三四千人追竄至甯鄉後又據
該大臣派令知府朱啟仁帶潮勇四千名總兵常祿帶兵一千七
百名及張國樑捷勇四千名馳往長沙西北一帶遏其竄往湘陰
之路湘陰係赴岳州必由之路且堵賊之兵數已倍半何以任賊

直隸岳州毫無堵禦閱該大臣等本日奏到連日追剿情形所有帶兵將官及兵勇等一味尾追從無一路繞出賊前者相沿惡習實屬可恨至所稱賊退至河邊各邨我兵恐有埋伏未敢再追又於二十八日由河岸跟追所走均田塍小路兵勇魚貫而行甚爲遲滯若云均係田塍向榮何以繞別路行走可見均屬捏報以掩飾遲延之咎是沿途追剿之兵顯有耽延情事且水路船隻亦帶兵大員早應籌辦之事何以不豫爲布置使賊先已搶占我兵轉無船可渡顯係藉詞諉罪以掩其遷延玩誤該大臣等僅參一縣令了事豈於軍營惡習竟不加察岳州失守數日該大臣等近在長沙尙茫然不知可笑可氣之至惟聽各將官等飾詞稟報任其耽延貽誤抑亦已知岳郡失事故分兩次奏報耶似此舉動豈不又蹈從前覆轍徐廣緒著卽遵前旨迅統大兵間道馳赴岳州迤

北一帶督勦毋得再有遲滯並著查明追勦不力及岳州失事各員分別擬罪具奏備查有臨陣退縮及坐視不援者一面奏聞一面以軍法從事毋稍寬縱徐廣縉到楚以來軍營並未有起色朕用汝朕自知愧第問汝於心何忍何安本日有人奏武昌荊州及樊城等處宜各設重兵防賊分竄各處團練皆有名無實一聞賊警紛紛搬徙該大臣督撫等須嚴飭地方官先期曉諭居民同心協力保衛城垣以期眾志成城迅掃賊氛毋再延誤致干重罪將此由六百里諭令知之○壬戌月食○諭軍機大臣等陸建瀛奏查明長江守禦一招已有旨諭令江蘇安徽江西一體嚴防矣據稱逆匪若竄入長江惟有於湖北之漢口以下至黃州所屬之蘄州廣濟等縣察看江岸寬窄約計礮力能及處所較定準頭節節嚴防以備不虞等語逆匪竄入岳州昨已諭令徐廣縉常大溶等

將武昌漢口漢陽荊州水路各要隘分設重兵防賊奔竄並諭以漢口地方爲大江南北咽喉賊易垂涎尤應設法保護茲據陸建瀛所奏各節該督籍隸楚北所奏自係實情著徐廣縉常大澣按照所陳悉心體察水陸地勢扼要設防尤須派委得力大員前往督率豫爲布置鎮撫人心毋致臨時猝辦稍有延誤將此由六百里各諭令知之○諭陸建瀛奏查明長江設法守禦情形一摺據稱彭澤縣屬小孤山一拳孤露挺峙江心旣乏藏兵之地又無泊舟之所難以設防宜於湖北漢口以下至黃州所屬之蘄州廣濟等縣節節嚴防等語所奏自係實在情形已有旨諭令徐廣縉常大澣迅籌妥辦矣惟江路綿延數千里見在賊匪被剿竄入岳州難保不窺伺武昌漢陽希圖順流東下江西安徽江蘇沿江各處自應一體豫籌防守著陸建瀛楊文定蔣文慶張芾各就地方情

形詳加察看凡屬扼要處所妥爲設防總以鎮靜人心爲要至管帶兵勇尤貴得人務當遴派得力文武員弁飭令認真督率毋致臨時猝辦稍有延誤將此由四百里各諭令知之○癸亥徐廣縉張亮基羅繞典駱秉章奏據向榮函稱初三日督率常祿等兵勇趕至大荆鋪聞逆匪連夜逃竄將到岳州當卽拔營追趕一面專弁移咨在岳防堵之提督博勒恭武屬其靜鎮嚴防能固守一二日大兵卽可趕到乃向榮於初四日行抵岳州之新口鋪已聞岳州失守並有巴陵縣走出之犯詢據供稱岳州官員於初二日先已出城初三日早知縣亦卽出城午刻賊分三股擁至官兵全行潰散城門大開無人把守該匪隨卽進城城內火藥大礮及餉鞘一切均已資賊等因臣接報之下憤懣難言查岳州有提督博勒恭武武昌道王東槐帶兵在城防堵城池亦尙完固賊卽十分猖

獮守禦總屬有餘但能固守兩日則向榮之兵已至儘可扼其前
竄乃竟望風而潰從前稱雇募漁勇種種防堵盡屬虛文實屬罪
無可逭此時匪踞岳州水陸俱可竄往武昌如由武昌北渡則漢
陽荊州等屬無處不當嚴防已飛飭向榮派兵四五千名由通城
崇陽一帶迅速繞出武昌以資援剿見在賊蹤尙無定向俟確探
匪竄何處臣亦卽督率將弁趕往剿辦惟是沿江上下防不勝防
賊匪奔竄剽疾稍有疏虞則豫皖江西等處不免震驚臣徐廣綰
力小任重似此情形斷非一人所能兼顧惟有仰懇 皇上天恩
另派重臣分路堵剿並飭附近湖廣各省督撫專力堵防俾臣徐
廣綰專辦督剿庶期迅掃賊氛其失守岳州文武員弁俟確切查
明嚴參治罪臣徐廣綰調度乖方致派往攔截及追剿之兵均不
能迅速趕上咎無可辭應請 皇上嚴行治罪以儆玩弛常大瀆

雙福奏疊據探報該匪於十一月初三初四等日全股竄踞岳城後卽擄掠商船由湖南臨湘縣之城陵磯陸續轉竄湖北歷監利縣之楊林磯嘉魚縣之瀘溪口簪洲順流直下約有船四五百隻賊眾數萬多係勾結土匪裹脅平民沿途口隘所設兵勇雖經堵截攻擊而賊船假扮商船溷雜莫辨所有湖南甯鄉益陽一路賊匪全歸岳州一路北竄見探首逆賊隊尙踞岳州攔阻向榮等追剿之兵聞俟眾匪齊抵武昌卽行登岸攻撲省城首逆亦卽率眾竄來頃又探報前股賊匪已先後至江夏縣之金口肆行燬掠距省城僅六十里臣等查湖北省城周圍二十餘里前存防兵及見到陝甘官兵共止三千餘名其雇募民勇亦僅千數百名堵守城堞尙屬不敷何能備剿且對江之漢陽府城暨漢口鎮商買雲集均無兵勇防守臣等雖於武漢上游派有戰船水師堵截未識能

否抵禦况該匪棄舟登岸陸行更近實屬萬分危急業已督同官紳兵勇登城嚴備雖民情堅定可期固守危城若援兵遲到亦慮事不可測仍懇 天恩飭下徐廣縉迅卽帶兵來北不勝懸望迫切之至 上諭內閣本日據徐廣縉等奏岳州失守急籌堵剿復據常大滄等奏賊匪竄踞岳城湖北省城防堵情形各一招披覽之餘實堪憤懣自賊竄長沙疊經降旨令於岳州荊州各要隘嚴密堵剿該地方官應如何認真防守乃賊匪於初三竄至岳州而該郡官員於初二三等日先出城外以致官兵潰散賊匪得以竄入府城是進不能戰退不能守平日毫無準備遇變卽棄城而逃似此昧良喪心實出情理之外著徐廣縉等嚴行查辦此等貽誤員弁若不擇其尤者正法數人何以挽回積習昨因該大臣等奏報遲延已降旨交部議處茲據徐廣縉具摺請罪當此軍務緊急

調度乖方身爲統帥咎豈能辭徐廣縉著革職畱任張亮基鮑起
豹均有地方之責著各降四級畱任見在賊眾盤踞岳郡窺伺武
昌據常大瀄奏向榮已派總兵常祿王錦繡帶兵赴援已抵湖北
省垣仍著徐廣縉飛飭向榮統領重兵星速由通城崇陽繞出武
昌截賊前路該大臣亦卽親督鎮將直赴武昌於水陸要隘分布
兜剿荊州一帶著將軍台湧等一體嚴密防範毋任匪黨竄逸並
著羅繞典張亮基鮑起豹等嚴防賊匪回竄之路見復添調各省
精兵陸續前進誓必滅此醜類拯我生民該大臣等具有天良其
各悉心籌畫庶可以功補過儻仍前玩忽再失事機其能當此重
罪邪近來地方惡習一聞警報輒藉詞擇險防堵先行出城規避
取巧實堪痛恨該大臣督撫等著隨時嚴查儻賊經過地方文武
員弁仍蹈此等惡習卽一面奏聞一面正法以昭炯戒而肅軍律

○諭見在逆匪竄入岳州將竄湖北河南省應辦防堵著派署布政使鄭敦謹馳赴信陽州一帶會同南陽鎮總兵柏山扼要籌辦署河南巡撫琦善著迅速啟程馳抵楚豫交界地方督飭嚴防前已有旨添調陝甘兵二千名西安駐防兵一千名並帶兵副都統鎮將各員均著交琦善調遣並著訥爾經額於直隸官兵內揀派精兵三千名交提督陳金綬統帶隨同琦善前往直隸提督印務著保恆署理○諭昨已降旨諭令安徽江西等省於沿江一帶節節嚴防見在賊竄岳州江防尤關緊要署江西巡撫張芾著卽馳赴九江督同該鎮總兵清保及地方文武辦理防堵其省城事務著布政使陸元烺會同在籍尙書陳孚恩並司道等妥爲辦理安徽按察使張熙宇壽春鎮總兵恩長著馳赴沿江扼要處所會同辦理防堵事宜巡撫蔣文慶仍駐省城就近調度毋稍疏忽○諭

軍機大臣等昨已有旨飭令陸建瀛等於安徽江西沿江一帶節節嚴防本日據常大瀄等奏逆匪竄入岳州後擄船四五百隻順流直下前隊已竄入江夏縣之金口距省城六十里等語已明降諭旨令署江西巡撫張芾親赴九江安徽按察使張熙宇出省各會同鎮將於江防扼要處所督辦防堵矣該督見駐豐工堵築決口人夫雲集督率彈壓正當萬分喫緊之際自未便遽離工次仍當隨時知照江西安徽偵探賊蹤儻必須該督親往卽著帶官兵馳赴扼要地方督辦軍務河工均關緊要總須兼顧毋稍貽誤將此由六百里諭令知之○諭本日據徐廣縉等奏岳州失守並常大瀄等奏賊蹤逼近湖北省城各一摺覽奏實深憤懣已明降諭旨將徐廣縉革職畱任張亮基鮑起豹降四級畱任矣該匪突入岳州守城官員膽敢紛紛出城以致郡城失守火藥大礮餉鞘均

以資賊可見湖南地方官吏前此並未講求守禦殊堪痛恨卽如
城陵磯地勢險要向榮等追剿之兵何以不疾行繞前扼守任令
順流北駛該大臣所調度者何在見在該匪擄船四五百隻聚眾
數萬直抵距武昌六十里之金口湖北省城危急防兵僅止三千
餘名益以王錦繡常祿趕到之兵亦僅止五千餘名深恐不敷堵
禦且該省沿江直下經九江至安慶瞬息千里防不勝防而對江
之漢口尤爲賊所垂涎北由孝感西由荊州襄陽則河南震驚賊
勢剽竊所陷城池擄掠卽行並不似永安道州尙爲久踞之計其
心叵測若再遷延觀望止事尾追貽禍何可勝言該大臣等以爲
朕不能執法從事邪著徐廣縉親督大兵迅卽繞赴武昌設法救
援並飛飭向榮等先到之兵與湖北見有兵勇合力攻擊並設法
邀擊在後之大股賊匪毋令會齊併力死拒其博勒恭武收回潰

散之兵與瑞元防守蒲圻之兵能否在通城崇陽一帶接應以牽制賊匪使不能由陸路躡我之後所有各路運到軍餉火藥與武昌城內軍餉火藥應如何密籌分別布置文報往來驛路如何繞越省垣備禦之器械土石如何源源接濟著徐廣縉常大瀄等妥密辦理城內奸細尤須晝夜偵緝防守不力之文武員弁一經查明卽行按律正法務期保守武昌漢陽兩處於水路上游嚴兵扼守毋令賊匪更肆竄擾荊州一帶台湧仍遵前旨嚴密防堵仍著羅繞典等嚴防該匪回竄長沙常德等郡萬勿再有疏虞致干重罪將此由六百里諭知徐廣縉羅繞典台湧張亮基駱秉章常大瀄並諭鮑起豹雙福並傳諭向榮知之○予廣西陣亡一等男阿爾精阿等祭葬世職○甲子諭內閣輦轂重地理宜肅清本年八月初三日海澱老虎洞地方有一夜連劫二家重案疊經降旨將

該管營汛及副指揮等官摘去頂帶分別議處飭令迅速嚴拏此案賊匪膽敢於園汛地方糾夥疊劫拒捕傷人且是夜值朕還宮已傳三籌之後站道官兵森列熟視無覩實出情理之外若不速獲重懲何以清禁地而申法紀乃降旨以來迄今三月步軍統領衙門及五城御史時有拏獲匪犯奏交刑部於此案並無一獲順天府曾奏拏獲李四趙環等疊劫盜首亦非此案兇犯似此特旨飭拏要犯遷延日久任令遠颺該地方文武所司何事朕聞近日香山四王府一帶及圓明園青龍橋地方屢有騎馬盜匪數十人持械經過更夫瞥見鳴鑼轉被該匪威嚇經兵役救護解散園汛重地匪徒藐玩至此該管大員及分轄文武等豈竟毫無見聞抑因尚未失事任聽消弭邪若再因循日久釀成巨案該管大臣等自問應得何罪卓秉恬歷任有年突經署任亦不爲不久何得如

是玩泄嗣後務當力振積疲嚴飭所屬認真緝捕所有老虎洞地方劫案內首夥盜犯仍著步軍統領衙門順天府五城一體迅速嚴拏悉數弋獲不准一名漏網並著直隸總督派員訪緝近京一帶查有窩藏處所迅卽毀其巢穴淨絕根株徹底嚴行究辦其香山青龍橋等處各匪一併嚴密躡訪拏獲懲辦儆地方文武徂於諱飾徇庇積習不知振作卽著嚴參懲處毋許姑容○協辦大學士戶部尚書禧恩卒贈太子太保予祭葬謚文莊○以文慶爲戶部尚書

山內閣學士遷

○乙丑常大瀉雙福奏賊船於十二日辰刻馳至

武昌省城江面當經兩岸開放大礮並師船開礮迎擊打沈划船無數詎該匪繞登對岸撲漢陽府城經一晝夜尙無確信旋據探報又有股匪約六七千人由蒲圻陸路竄下直抵省城東門外分作兩翼撲來

臣

等卽於城上開礮抵禦擊斃賊匪數十名旋退踞

洪山一帶查該匪自湖南竄入益陽後由小路攻撲岳州占踞府城搶擄商船加以沿途土匪引導旬日間水陸猝至賊勢猖獗已極而湖北存城官兵及陝甘續到者僅止三千餘名其湖南派來總兵常祿王錦繡所帶兵二千七百餘名因在中途被賊截擊衝散實僅到省千餘名合計官兵止五千有餘分布城垛等會同該總兵等與文武各官晝夜駐城督率兵勇誓以死拒惟賊眾數萬同時水陸猝至四面環攻實屬萬分危急應請旨飭下徐廣縉等迅卽帶兵北來不勝懸望迫切之至再賊船灣泊省城上游之十餘里約數百號俱安有礮位所載軍火糧食甚爲充足兩岸對渡又便於接應我兵水陸俱被截斷糧運不通必須先將大小賊船剿盡方可制勝聞湖南大營帶有粵西礮船應請飭飛調來北助剿至下游江西安徽各省急須嚴行堵禦該匪早有直竄南京

之說應請飭調江南水師廣艇礮船並中號小號礮船多隻攔截九江順風逆溯武昌一路迎頭截擊不特可遏其下竄並可斷賊兩岸接應去其糧食剿辦方能得手至武昌省城食用等物向仰給漢鎮店市及客商貨船今因賊匪猝陷岳州連船下竄所有店貨商船逃徙一空錢米油燭等物無從購辦又水陸梗塞更難轉運進城應請飭下湖南糧臺多爲購辦來北及探查轉運路徑以資接濟 上諭軍機大臣等據常大涇雙福馳奏賊匪大股水陸齊至見飭登城固守等情一招覽奏實深焦灼自逆匪竄入岳州卽由六百里加緊諭令徐廣縉迅統大兵馳赴岳州迤北一帶督剿該大臣諒已剋期赴援惟賊船已於十二日至武昌省城江面復繞登對岸攻撲漢陽府城又有股匪六七千人由蒲圻陸路竄下直抵省城東門外分作兩翼撲城賊勢猖獗已極湖北存城官

兵僅止五千有餘情形甚屬危急武昌重地且爲南北咽喉豈容稍有疏虞常祿王錦繡所帶之兵未到省城先被賊匪追襲止贖一千餘名是否有退縮情事著徐廣縉查明具奏該大臣務當統帶官兵星速北來並飛催統領官兵之向榮及各帶兵大員帶領兵勇兼程前進救援武昌萬不可稍有耽延再誤事機常大瀆雙福駐紮省垣守城是其專責務須督飭在城文武紳民竭力守禦以待援兵並隨時嚴查城內居民無令奸匪潛入漢陽與武昌對岸僅隔一江實屬唇齒相依亦須飭令該城文武並紳民人等合力固守就近爲武昌聲援又據常大瀆片奏湖北口糧等需無從購辦請飭湖南糧臺多爲備辦又湖南大營帶有粵西礮船請飛調來北助剿各等語著徐廣縉卽照該撫所請酌量妥速辦理毋稍貽誤常大瀆所請飭江南水師廣艇礮船逆泝截擊一節已由

六百里諭令陸建瀛迅速趕辦矣本日據給事中曹琳堅奏漢陽同知張曜孫素得民心請督令辦理團練堵剿朕思岳州失守並非賊匪攻陷實由地方官棄城而逃深可寒心若城中文武得人登陴堅守賊近則受挫退則被追何至肆行無忌見在防堵切近地方官必應擇其才能幹濟民心素服者調遣位置庶能爲民保障不至臨事巧避再蹈覆轍也又有人奏湖南瀏陽縣東鄉有會匪周國虞等設立徵義堂名目糾合匪徒多年盤踞暗蓄異謀且藉團練爲名肆行搶劫前陝西官兵長沙城外失事卽係墮該匪等奸計著羅繞典張亮基等嚴密訪查設法妥辦總期消患未萌勿致激成事端轉與大股逆匪勾結爲患原片並會匪名單鈔給閱看又據編修許彭壽奏經過湖南見所傳鈔報竟將寄信諭旨刊布等語軍營事機理應慎密何以任令外間刊刻傳播可見一

切緊要布置必多漏洩既不能確偵賊情又復宣露機密何以運籌決勝著將刊本三件發交閱看該大臣督撫等此後凡奉寄諭及軍中號令一體加意慎密毋稍疏忽致干重罪前有旨諭裕瑞挑選成都駐防兵五百名派員管帶至楚交蘇布通阿統領此項兵到該大臣卽飭令該提督遵照以備調遣又御史王之斌奏楚境水陸要隘應行防剿情形一摺著一併鈔給閱看將此由六百里加緊諭知徐廣縉羅繞典張亮基常大澂雙福台湧駱秉章並傳諭向榮知之○諭見在逆匪竄踞岳州直犯武昌勢甚猖獗沿江各省均須急籌防堵陸建瀛見住豐工督率彈壓正當喫緊之時惟安徽江西俱係該督兼轄省分儻軍情緊急必須親往督辦卽著扼要駐紮以資調度河工要務楊以增卽督飭查文經妥速辦理毋稍延誤常大澂等片奏請調江南水師廣艇駁船並中號

小號礮船多隻攔截九江順風逆泝武昌一路迎頭截擊等語著該督酌量緩急無分畛域合力堵截並著該督撫等分飭地方文武大員於沿江水陸要隘節節嚴防毋得稍有疏失將此由六百里各諭令知之○諭本日據琦善奏馳赴督防添調兵丁及籌辦情形各條朕詳加披覽所奏不爲無見已有旨諭令吉林黑龍江直隸陝甘各將軍督撫挑兵備防另片奏請籌兵餉亦著戶部迅撥軍需銀二百萬兩以備湖北軍營及河南調兵之用惟酌加養兵之費一節意在體恤兵丁見在軍營兵餉均係照例支給若將新調兵丁增加銀兩恐楚省軍營兵心向隅易滋藉口見命戶部查釐成案議奏該署撫仍應全盤籌畫凡事慎之於始庶免流弊所請調鑾儀衛使武慶等隨營差委已明降諭旨允准矣行軍之道總在因地制宜隨時通變一切應辦事宜該署撫既膺重任自

當竭力圖維兼權並計也勉之望之將此諭令知之○諭琦善奏請籌備兵餉等語見在賊竄湖北軍需緊要河南防堵亦須重兵一切供支款項均須急籌著戶部迅速籌撥餉銀二百萬兩分解軍營及河南聽候撥用另片奏請酌加養兵之費每名於例給之外酌量加增以示體恤據稱嘉慶年間前總督那彥成在滑縣用兵前大學士托津在開州防堵兵丁皆有加給之處著戶部詳查檔案覈議具奏將此諭令知之○諭琦善奏請飭直隸挑選烏槍長矛單刀兵丁等語著訥爾經額督同提鎮各員專選夙習烏槍長矛單刀之兵無須弓箭不必按營勻派惟擇技藝精熟者逐加挑選其帶兵各員尤須年力精壯方可得力著一併遴選不得派委怯懦將弁至例給餘夫原藉以紓兵力著准其由本處自行攜帶每百名止准帶餘夫三十名以免派累民夫之弊帶兵將弁尤

須申明紀律以肅戎行陳金綬將提標官兵挑選後卽著迅速啟程毋稍遲延將此諭知訥爾經額並諭令陳金綬知之○諭據琦善奏遵赴楚豫交界督防請飭陝甘挑選烏槍長矛單刀兵丁並調甘肅銅礮等語著舒興阿張祥河專選夙習烏槍長矛單刀兵丁無須弓箭不必按營勻派惟擇技藝精熟者逐加挑選毋以庸劣充數其帶兵各員尤須年力精壯方可得力著一併遴選不得派委怯懦將弁儻查有吸食鴉片弁兵尤應嚴加斥汰毋令濫竽至例給餘夫原藉以紓兵力著准其酌量由本處自行攜帶每百名止准帶餘夫三十名照例折給夫價以免派累民夫之弊琦善前在陝甘總督任內所製銅礮四十尊著舒興阿卽派員運赴河南並備帶礮車礮子火藥修理工具以資利用又據御史王茂蔭奏湖北省地居腹裏自襄陽開道可直達陝西之商州請飭豫籌

嚴防以杜賊匪竄越之路等語見在賊匪竄至湖北所有鄰境均須嚴密防堵前已寄諭舒興阿張祥河於南山一帶不動聲色妥爲布置著該督撫遴派明幹大員前赴陝西湖北交界地方扼要防守隨時偵探嚴查奸細毋任賊匪偷越至山谿僻徑應如何籌防並著相機妥辦總以鎮靜人心爲要御史王茂蔭原摺著鈔給閱看將此由六百里各諭令知之○孫毓淮以病免調蘇敬衡爲浙江按察使以文煜爲四川按察使由直隸調○調山東浙江兵各二千名赴安徽防剿○丙寅諭內閣前因岳州失守將派往防堵之湖北提督博勒恭武先行革職並交徐廣縉查明該革員是否禦賊受傷又諭令將棄城逃走各員一併嚴行查辦守土各官遇有賊匪竄擾如能相機籌度或嬰城固守或出城奮擊文武各盡職守何至任賊橫行毫無阻遏近日地方惡習一聞警報藉詞

防堵出城規避前已降旨飭令該大臣督撫等隨時查辦因思帶兵員弁遇有要隘可扼仍須督兵堵剿又豈可藉詞退避城中棄險不守見在賊匪經過處所如有出城逃避員弁卽當按律懲辦儻臨陣畏葸不出以致棄險失機者亦應查明嚴參治罪以肅軍律毋稍徇徇將此通諭知之○諭昨因逆匪竄擾武昌已有旨諭令陸建瀛酌量軍情如必須親往卽扼要調度本日復據雷以誠奏江南富庶賊易覬覦若順流東竄在在可慮等語著陸建瀛楊文定蔣文慶張芾仍遵前旨分飭地方文武大員各於水陸要隘節節嚴防毋稍疏失見在豐工正當喫緊之際朕心深爲懸繫若陸建瀛駐工督辦一切呼應較靈更易集事儻因軍情緊急必須該督前往調度亦不能不先其所急朕思青麐交卸學政尙未來京著卽暫留工次幫同該督等督率彈壓如陸建瀛前往要隘防

堵工次仍有大員幫辦亦不爲無益江甯省城重地卽著楊文定前往暫行駐紮就近調遣陸建瀛兼轄三省應如何酌量緩急相機籌辦之處朕亦不爲遙制總期撫綏鎮靜毋失事機又據陸應穀奏河南急應防堵請將江南前辦夷務時所置礮位收存江浦者調取三十尊著卽照數發交河南委員星速運回以資守禦至沿江一帶圖山關以下並各江洲從前設防處處俱有大礮並礮車運用亦極靈便如長江防堵水陸要地需用此礮卽可暫移濟用惟應位置得地護守得人斷勿稍有疏虞是爲至要雷以誠原摺片御史王茂蔭所奏江防形勢一摺均著鈔給閱看將此由五百里各諭令知之○諭前因楚匪北竄河南亟須防堵諭令鄭敦謹馳赴信陽州一帶會同南陽鎮總兵柏山扼要籌辦本日據陸應穀奏賊情緊急請調兵防堵一摺河南與湖北毗連地方甚多

水陸皆通在在堪虞此時逆匪圍撲武昌漢陽勢甚緊急南省追兵計日趕到合力夾擊難保不再圖北竄該署撫見在派撥官兵於信陽新野等要隘防堵惟兵力尙單所調鄰省之兵一時未能趕到著陸應穀於河南各營再行抽調一二千名迅速派往交界處所擇險布置俟新調兵到仍可撤令歸汎見命琦善署理河南巡撫復調直隸陝甘精兵不下萬人交琦善統帶不日即可趕到該署撫卽督同鄭敦謹柏山崇安等嚴密防守並曉諭近楚居民團練保衛無致驚惶遷徙仍須密查奸細嚴防擒匪句結該署撫如須出省調度卽著擇要前往駐紮俟琦善到日再行來京至所稱調江浦大礮三十尊已諭令陸建瀛照辦矣昨據御史王茂蔭奏豫籌防堵一摺著一併鈔給閱看將此由五百里諭知陸應穀並傳諭鄭敦謹柏山知之○調山東兵一千名山西兵三千名赴

河南防剿○丁卯諭內閣黃宗漢奏藩司自盡出缺一摺據稱浙江布政使椿壽於本月初九日夜間在署自縊另片奏浙江錢漕諸務支絀本年久旱歲歉徵解尤難該司恐誤公事日夜焦急以致迫切輕生而椿壽遺屬內有因情節所偏勢不能生之語並未指明係何情節該司以二品大員卽令公事難辦何至遽行自盡是否另有別情著該撫再行詳細訪察據實奏聞毋稍隱飾尋奏該司因庫款不敷漕務棘手致肝疾舉發因而自盡並無別情報聞○諭德勒克多爾濟等奏喀爾喀兩部落汗王貝勒貝子公扎薩克台吉等因賊匪滋事捐銀二萬兩以備軍需一摺喀爾喀土謝圖汗車臣汗兩部落汗王等聞賊匪滋事請捐銀二萬兩實屬忠心出於至誠惟軍營應用銀兩見已備妥足敷支用且念蒙古人等生齒日繁全賴此項銀兩生計若遽行收納朕心深爲不忍

況各省大兵已將雲集蠢爾么膺必可立時撲滅所捐銀兩毋庸
賞收以示朕軫恤蒙古世僕至意德勒克多爾濟捐輸本身銀二
千兩實屬誠悃著卽賞收加恩交該部從優議敘○諭德勒克多
爾濟等奏哲布尊丹巴呼圖克圖庫倫堪布諾們罕率領喇嘛等
捐銀一萬兩呈請轉奏一摺該呼圖克圖等甫聞賊匪滋事情願
捐銀一萬兩實屬忠心出於至誠惟見在軍需尙屬饒餘足敷支
用所捐銀兩著毋庸收納並著賞給該呼圖克圖呼畢勒罕黃哈
達一塊轉交諾們罕俟伊師哲布尊丹巴呼圖克圖呼畢勒罕
坐牀後再行賞給其發去賞給庫倫堪布諾們罕羅布桑楚勒特
木濟斯默特哈達一塊俟接到時著德勒克多爾濟等轉行賞給
以示朕嘉尙呼圖克圖等之意○諭陸建瀛奏參浙江總運幫弁
請旨分別議處革職一摺浙江台州前等四幫漕船因冬令水淺

行至丹陽一帶不能前進經陸建瀛奏明飭令折回乃各幫弁藉詞觀望屢催罔應以致來往船隻均被阻滯湖州府總運浙江候補運副湯世勳著交部嚴加議處首先抗違之温州前幫千總黃振著卽革職並著黃宗漢速飭新任糧道周起濱馳赴該處督飭湯世勳等將各幫重運漕船概行折回湖州水次聽候酌辦如再抗違卽著嚴參治罪沿途水手人等卽責成該道押令安靜行走並著江蘇地方官一體妥爲彈壓毋致滋生事端○陸建瀛奏據署邳州知州吳棠稟九月初八日風聞山東捻匪靳豹等有竄入該州鐵佛寺地方之信當卽會營帶領兵勇馳往堵拏該匪等折回郟城界之老溝集聚眾百餘人勢將抗拒官軍奮勇向前該匪竄逸當卽跟蹤追捕由郟城縣之楊家集至海州交界之馬陵山該處路徑歧錯不便窮追僅在郟沐交界之高唐溝拏獲祿懇志

等五名又據海州知州稟稱聞有山東擒匪竄至馬陵山內與州境止隔一嶺當由營派委千總秦懷揚等馳往堵剿拏獲劉百水等八名該匪復竄至博望鎮向李安邦訛詐銀錢秦懷揚等又擒獲楊兆舉等三名該匪糾眾竄過馬陵山海州知州毓彬海州營參將游桂林親督秦懷揚等於十三日巡至阿湖鎮附近荒廟內見有匪徒數十人在彼潛伏正在兜拏另有兩起匪徒分路趕至開放槍礮幫護拒捕該州營等卽令署守備朱大平等帶兵五十名繞至賊後兩面夾擊生擒擒匪張起瀾等二十七名格殺楊桂等二名奪獲擡槍擡礮刀械多件該匪等始各逃散卽飭將見獲各匪嚴行審究並勒限嚴拏著名擒首期在必獲斷不准一名漏網

上諭陸建瀛奏飭緝匪徒擒獲多名等語邳州海州文武各員不分險域追逐緝捕擒獲匪犯多名辦理尙屬認真著陸建瀛

楊文定卽飭該員等將見獲各犯嚴行審究並著李德督飭山東
交界地方文武迅速合力嚴拏著名捻首及夥黨全數弋獲以懲
兇暴而安善良○諭軍機大臣等前據陸建瀛覆奏小孤山設防
不如於上游黃蘄等處扼險防堵當降旨諭知徐廣縉常大清等
照辦並令該督撫等察看地方要隘處所豫籌防守茲據該撫奏
稱小孤山實爲長江之鎖鑰皖省之門戶斜對南岸彭郎磯南寬
里許北寬半里兩岸擡礮並發均足擊及中流彭郎磯背緊靠江
濱並可安放大礮迎擊等語該撫既經委令升任雲南臬司張印
塘親詣查勘派兵馳赴防堵並添募水勇操演卽
著照議妥辦前有旨令張印塘留於安徽辦理防堵事宜著蔣文
慶卽飭該員會同張熙宇恩長悉心籌辦所募水勇能否得力務
須操練純熟不可有名無實粵楚地方每因奸匪勾串內應以致

失事兒在辦理防堵無論城鄉水陸總以盤查奸細爲第一要務一切布置機宜尤須加意慎密使賊無從探聽而賊中情僞又必應確偵豫防方不至墮其奸計其界連湖北江西之英山霍山太湖婺源祁門建德等縣並著嚴密設防毋令賊匪竄入將此由六百里各諭令知之○以麟桂爲浙江布政使調沈兆雲爲山西按察使賞張集馨四品頂帶爲河南按察使前河南布政使○己巳諭軍機大臣等有人奏湖北省城拏獲奸細數十人見皆監禁等語賊匪正在武昌漢陽盤踞城中奸細必多已獲之犯訊明如果屬實卽應正法以絕句串內應切勿遲疑致滋他變近日失陷城池多因奸細溷入著徐廣縉常大清密飭地方官無論城鄉要隘均應嚴密盤查不可稍有疏忽逆匪等自岳州竄徧湖北省城圍撲漢陽及過山營盤情形緊急數日來未接徐廣縉奏報朕心實深焦灼

疊經降旨令向榮趕緊赴援並令徐廣縉督飭大兵星速前進不知此時如何攻剿向榮雖經獲咎而該大臣仍令其統領諸軍朕亦念其前守桂林之勞停其發遣俾令趕赴長沙協同固守兩月以來尙無貽誤此次賊匪北竄岳州向榮不能迅速救援而其趕派常祿王錦繡帶兵星馳赴援武昌到在賊前見事尙屬機警向榮久於行陣朕看其屢次舉動尙非無用之才此時武昌戒嚴正伊奮激圖報之日如能迅速剿賊不但可贖前愆並可重邀恩眷著徐廣縉卽將此旨宣示向榮俾知感勵朕用人一秉大公功罪皆由自取想該革員必能仰體朕始終成全之至意將此由五百里諭知徐廣縉常大清並傳諭向榮知之○庚午諭內閣御史周有蘆奏軍營員弁浮冒錢糧請嚴行稽覈一摺據稱軍營統兵員弁希圖浮斂錢糧捏報名數以少報多管帶練勇之員亦皆效尤

陣亡兵勇數目並不據實開報總局大員明知不查豫爲奏銷地步致軍需要款半歸私橐所奏切中情弊自軍興以來疊經該部行查調兵到營日期及傷亡裁撤數日等款並未據該省奏到其爲意存虛捏已可概見當此紛紛籌餉之時何堪任聽劣員從中漁利著見在辦理軍務之大臣督撫等嚴飭管理糧臺總局各員詳細稽查卽將藉端舞弊昧良肥己劣員指名嚴參以肅功令而慎度支又片奏各省動用帑項每於奏銷時先遣人與戶部經承議定部費豫防部駁等語各部院衙門書吏因公需索大千例禁並各該堂官督飭司員隨時密查如有部費名目及各項弊端著卽奏交刑部嚴行治罪毋稍姑容將此通諭知之○辛未諭內閣軍興以來將兩年矣廣西瘡痍未復湖南又遭塗炭近乃逆氛更熾擾及武昌漢陽所過郡縣悉被蹂躪雖桂林長沙兩省城幸保

無虞而我民之遷徙流離亦已不堪言狀朕御宇三載未能安輯
四方俾我民咸登衽席深宮自省豈止寢食不安因思軍營將帥
及各督撫大臣皆先朝舊臣留爲保我子孫黎民之用際此時
艱孔亟宜如何同心協力奠我蒼生以撫朕之不逮朕爲吾民請
命不但祈禱頻仍每閱軍報至地方被害情形朕心如擣前命徐
廣縉統領大兵分飭提鎮追剿羣匪直抵武昌復命陸建瀛蔣文
慶張芾等各督官兵泝流迎擊昨又命琦善統帶各省馬步精兵
萬餘屯守河南南陽汝甯光州一帶爲楚省應援另調吉林黑龍
江勁旅隨後接應合三省之兵力不分畛域直趨湖北合力攻剿
逆匪以左道煽惑愚民肆行搶掠荼毒生靈實屬覆載不容神人
共憤經我軍疊次殲戮外其兇悍之賊不過數千餘眾大半皆裹
脅之徒其甘心從逆者無多揆之天道人心賊匪惡貫滿盈必當

指日殲除不至久爲民患朕不惜數千萬帑金藉資勦辦本日又特頒部帑以濟軍需此外仍飭寬爲籌撥源源接濟該大臣督撫等均當仰體朕心爲民除害行軍之道紀律爲先務須信賞必罰約束嚴明俾知有進無退人皆用命卽小勝小負亦兵家之常事總宜據實奏報不可稍有粉飾朕賞功罰罪悉以軍報爲衡儻有偏重偏輕何以令在營軍士知感知懼至團練鄉勇乃民間自爲守禦藉以保衛身家或各村自爲一團或數村共爲一團其經費應由紳董自行經理豈可官爲抑勒且以守望相助之儔輒復紛紛調遣必致遷地弗良轉滋流弊民間捐助軍餉好義急公朕方破格施恩若地方官藉捐輸爲名委員四出苛派騷擾胥吏因緣爲奸又何以安善良而昭激勸卽如會籌軍餉條內稅契一節亦國家成例然或辦理不善亦足以滋擾累朕宵旰焦勞冀蘇民困

吾民一日不安朕心一日不釋前此被賊滋擾省分疊經降旨令該督撫查明奏請分別蠲緩撫恤茲者岳州失守擾及武昌漢陽一帶眷懷南服憂思益深若再令疆吏飭屬照常徵納小民其何以堪著該督撫悉心體察被賊地方分別蠲緩奏請恩施其餘應行徵收錢糧之處亦著嚴飭各州縣總期照舊開徵毋得稍有浮勒庶幾吾民於顛沛困苦之時不至再受追呼迫切之累該大臣督撫等卽刊刻謄黃徧諭閭閻其各仰體朕意速振軍心用殲羣醜毋再因循玩泄致干重罪將此通諭知之○諭軍機大臣等本日據陸建瀛張芾各奏江防緊急情形已降旨飭令分投防剿並明降諭旨剴切通諭矣逆匪竄入長江攻撲武昌漢陽一帶前據常大瀆奏報後又逾數日未得續報徐廣縉自報岳州失守以後亦無奏報是否因道路梗塞文報不通朕南望殷憂莫名焦灼見

在武昌城守情形若何徐廣縉向榮是否已統帶大兵繞赴湖北
逆匪後隊如尙留踞岳州作何分路攻擊湖南兵勇數萬急宜趨
赴前途或由江西捷徑繞赴武昌或取道蒲圻一帶將陸路竄撲
武昌東門之賊剪除並將被賊占踞之大洪山等處卽行奪回省
城形勢旣壯自能保固至漢陽切近省城情形危急必應迅速分
兵救應賊眾精銳不過數千餘皆裹脅見在聲稱數萬大半烏合
之眾總以合力攻剿爲第一要義若但紛紛防堵則水陸四達防
不勝防徐廣縉抵武昌後當權衡全局一面憑城固守一面飛咨
荊州將軍台湧督兵東下並知會下游各省師船泝江西上迎頭
截擊卽河陝北路之兵亦可由襄陽建瓴而下乘賊首尾勢分揀
選精銳併力兜剿勿但株守一隅毫無布置致賊匪肆行無忌徐
廣縉業已遷延於前若再任賊蔓延自問當得何罪再昨已有旨

切諭向榮該革員久歷戎行尙屬可用因思蘇布通阿係向榮推引賽尙阿奏令來營前據徐廣縉奏明已飭管帶川兵前進該員如果得力可令與向榮會同督帶鎮將奮力衝鋒以期克敵制勝軍營惡習爭功妒能最易誤事向榮與蘇布通阿平素旣無猜嫌臨陣必互相應援不至掣肘該大臣到營日久於諸將才質高下等差諒已確加辨察尤當隨時激勵鼓舞使之齊心効力勿蹈前此覆轍師克在和此語當時刻銘心也至大營兵勇雖多患在未能選練團勇一項尤不足恃急宜分別良莠妥爲裁遣以整軍威而節濫費本日據戶部片奏請將兵勇去留確數在營月日及節次傷亡弁兵數目分晰造報著卽照所議迅速辦理原片鈔給閱看隨營各勇名目甚多人數甚眾儻一時難於盡遣亦須酌量緩急不動聲色設法妥辦俾留營者驅使可收實用而遣散者亦不

至別滋事端方爲妥善前有人奏湖北形勢緊要一摺著摘要一併鈔給閱看將此由六百里各諭令知之○諭陸建瀛奏豫籌三省防堵張芾奏先委臬司馳赴九江防堵各一摺前因岳州失守疊經降旨諭令毗連各省迅速設防見在賊匪攻撲武昌及漢陽一帶其下游各省處處可通急應嚴密防堵俾不至分路竄擾而江西之九江府水陸皆與楚北毗連尤爲扼要之地前有旨令張芾督兵堵禦茲據奏已委臬司惲光宸前往會同該護鎮道暨署總兵音德布遊擊薛升堂並革員劉熾昌等籌辦張芾著仍遵前旨馳往督率調度省城重地陳孚恩與陸元烺等仍當全局籌畫勿稍疏虞所調鎮江舢板船四隻雖有水師方翔統帶是否足資抵禦陸路及江岸扼要處所亦必須派兵設礮互爲接應至安徽省雖在江西下游而順流而下片帆直達已據蔣文慶在小孤山

擇要設防前經降旨令張熙宇張印塘恩長等督辦諒不至稍有疏虞惟賊情詭詐必須水陸皆有準備方不至顧此失彼本日已明降諭旨令徐廣縉琦善與陸建瀛等三面兜剿見在河工軍務均關緊要陸建瀛著仍遵前旨酌量情形如須親往督兵調度卽星夜馳赴九江上游一帶扼要處所與張芾蔣文慶等相機布置並隨時知照徐廣縉琦善等合力進攻粵楚前調安徽之兵此時能否撤回並著咨商辦理江西之兵如能迎赴上游亦可助楚北聲勢至江蘇撥餉若全數截留江西安徽不知楚省能否敷用軍情緩急難以懸揣該督等亦應與楚省督撫隨時咨商不可稍分畛域致誤事機河南前調清江浦礮三十尊著卽運往以濟急用前諭令將圖山關以下及各江洲所設之礮暫移水陸要隘備用想陸建瀛亦已計及江防雖有遠近緩急必須層層布置尤應於

陸路險要設防不可稍有疏忽又聞奸匪到處潛蹤其衣服髮辮暗有記號亟應嚴密搜查以清內患本日有人奏議防不如議勦各摺片一併摘要鈔給閱看將此由六百里各諭令知之○賞署河南巡撫琦善二品頂帶○以羅惇衍爲左副都御史由通政使遷潘曾瑩爲內閣學士由光祿寺卿遷○壬申諭軍機大臣等寄諭欽差大臣署湖廣總督徐廣縉等御史陳慶鏞條陳軍務一摺朕詳加披覽所奏不爲無見昨因雨載軍興生民塗炭深宮自省寢饋難安特降旨宣示朕意並曉諭統兵大員嚴明紀律信賞必罰復令查明被賊處所分別蠲緩撫恤該御史見尙未覩明詔而所請特沛綸音刊刻謄黃與昨降諭旨實相脗合其所陳各節亦切中時弊當此防剿喫緊首重人和如地方官能得民心鎮將等能得兵心何患不眾志成城同仇敵愾至所稱寬脅從以散賊黨練精銳以遏

賊鋒惟在統兵大員體察民情振作士氣俾賊勢日孤軍威日壯庶可埽此妖氛其有能擒斬逆首者除賞銀十萬兩外卽封爵之榮世職之賞朕亦不吝該大臣等卽懸示賞格俾人人曉喻僥陷於賊營之人有能殺賊效命自拔來歸者亦可予以自新加之重賞其將弁兵勇有不用命及退避不前者卽分別嚴懲無稍姑息該御史摺鈔給閱看卽著採擇籌辦前據陸建瀛奏防江之法以黃州府所屬之蘄州廣濟等縣爲最要雷以誠奏沿江情形亦甚詳覈茲發去武昌下游各要隘說帖一紙其所稱青山陽邏鎮武磯頭道士汛等處均可設防著該大臣督撫等體察情形嚴密防禦水路固屬緊要陸路尤不可忽該匪駕船竄駛必有陸路奸細爲之接引若於陸路要隘處所暗伏兵勇多備槍礮則賊船經過何難轟擊殲擒該大臣督撫等務當不分畛域全局籌畫勿稍疏

虞將此由六百里各諭令知之○諭前因賊匪北竄降旨令舒興阿張祥河派員於楚省交界地方扼要嚴防本日據御史陳慶鏞奏湖北間道自襄陽至鄖陽即可入陝西商州等語著舒興阿等仍遵前旨於楚陝毗連南山一帶要隘妥爲布置先事豫防勿致臨時失措仍當鎮靜持重毋稍驚擾爲要前調西安駐防官兵此時想已行抵河南舒倫保仍將存營官兵加意操練以資捍衛毋稍疏懈將此由五百里諭令知之○諭前因江防緊要疊次降旨令陸建瀛酌度情形如須親往督辦卽著馳赴上游扼要調度見已數日未接湖北續報賊氛方熾難保不順流東下擾及沿江一帶該督前奏守禦長江惟有力爭上游之法所見極是昨復奏江西省將有水陸受敵之勢若賊匪闌入九江無隘可扼安徽小孤山亦僅於下游設防未能力據上游該督籍隸湖北於長江形勢

險要素爲熟悉此時武昌漢陽戒嚴恐無暇顧及江防江西兵力又形單薄朕再四思維湖北黃州蘄州廣濟等處沿江險隘恐有疏虞所關甚重著陸建瀛速卽馳往九江上游扼長江之險援應湖北卽爲江西安徽自固藩籬之計軍事變遷旦夕不一必須籌之於先庶免臨時倉卒朕聞黃州迤南百二十里爲道士洑江面最窄有山可據地勢極爲險峻應否於此地扼守與徐廣縉南路之兵互爲聲援一面與蔣文慶張芾熟籌布置賊情詭詐必不專由水路前來其陸路險要地方亦恐該匪勾結土匪與水路船隻互相牽制仍須水陸兼顧毋致失險卽如昨諭該督等收集木筏藉作江防亦須斟酌行之不可拘泥沿江船隻必須豫先收集以備我用毋爲賊匪所得豐工亦在喫緊之際該督起程後卽責成楊以增督同查文經竭力妥辦並飭該鎮道等認真彈壓稽查務

須趁此天氣晴和料物充足之時催令進占剋期合龍該河督係專管河務大員查文經亦兩次派辦河工責無旁貸儻再因循誤事朕惟楊以增查文經是問青磨於河工本非所習因其任滿回京暫令在工幫同彈壓非特派督辦者可比楊以增等不得藉詞諉卸青磨亦不可另出己見止須按照陸建瀛等所定章程迅速催辦合龍後卽行來京可也浙江糧船阻滯丹陽河道此時是否全行折回並著附報復奏以慰懸念將此由六百里諭知陸建瀛楊以增青磨並傳諭查文經知之○癸酉諭內閣著派火器營官兵四十名齎帶火箭二千枝並各旗營火藥二萬斤由驛前往河南交琦善差遣備用○徐廣縉奏據向榮報稱十一月初五日行抵岳州各鎮之兵亦陸續到齊趕緊設法攻剿城外四面高處俱紮有賊營而後隊之賊在林子口土星港各處搶擄船隻順流東

下已竄過岳州地面該匪水陸並下前路並無攔阻勢必徑撲武昌漢陽等處隨即派撥總兵常祿帶湖北官兵一千七百名王錦繡帶雲貴官兵千五百名從小路馳往武昌以期繞出賊前卽於初六日拔營前進向榮布置甫定於初七日早出隊逼近岳州府城探知賊船已經開動督帶各隊兵勇趕緊進攻城內賊匪業已紛紛逃竄兵勇登時搶上擒殺數十名追趕二十餘里因該匪大隊業已去遠卽在冷水鋪紮營此向榮追剿之兵也其餘福興玉山各隊在向榮之後蘇布通阿等又在福興之後經臣疊次嚴札催進總未能迅速趨行查賊匪自到岳州一路土匪裹脅不少其由旱路走者不過三四千人馬匹甚多我兵步行勢難趕上餘匪俱從水路順流而下所有船隻盡爲賊擄兵勇轉無船可渡向榮於初八日督率各隊緊追初九日匪已竄至蒲圻該處本有官兵

二千名守禦因省城緊要調回城中僅有兵四百名賊眾大至兵不能禦以致失守知縣周和祥罵賊不屈被戕甚慘賊匪一過卽竄大兵分起趕上距賊總有五六十里以致不能兜剿其水路之賊沿江而下竄撲漢陽郡城失守聞信之下憂憤難名查武昌漢陽一江對峙該匪旣踞漢陽則武昌情形極爲危急此時追剿之兵計已齊到武昌必須設法水陸並進方可力籌攻剿臣在長沙於十五日起程行抵湘陰據報巴陵縣屬土匪晏仲武勾串長髮逆賊招匪二千餘人沿途劫掠意在阻截糧道副將巴圖護解糧輜至新牆地面已被該匪圍搶臣隨卽派副將鄧紹良總兵阿勒經阿帶兵一千餘名前往剿辦該處係糧餉經由要道且岳州當殘破之餘文武尙未知下落設或更滋他變所關非細必須將此股剿滅南北方可無梗臣隨營之兵僅及千名見在趕調弁兵相

機前赴岳州督勦斷不敢再有遲延自干重咎至岳州失守該文武聞警先潰實未聞有帶兵迎擊之事見在該府縣如何下落尙未據稟報而先期逃散已無疑義相應請旨將岳州府知府廉昌巴陵縣知縣胡方穀岳州營參將阿克東阿一併按律治罪以肅官守臣見暫駐湘陰探明賊匪如由漢陽北竄卽須由荊州上流馳往督辦又無庸卽赴武昌惟匪勢潰散四出一時實無把握孤負天恩無任戰慄隕越之至 上諭自賊匪攻竄岳州疊經降旨令徐廣縉統帶大兵分飭提鎮直抵武昌一帶繞出賊前迎頭截擊茲據奏稱該大臣暫駐湘陰並稱向榮於初七日帶兵直逼岳州府城趕緊進攻賊匪紛紛逃竄兵勇登時搶上殺斃數十名生擒二十七名因該匪大隊已去向榮率兵緊追福興玉山之兵尙在向榮之後蘇布通阿等又在福興之後疊次嚴催總未迅速

避行以致賊由水路順流直下岳州文武當賊未至先自逃散並未聞有帶兵迎擊之事等語不料該文武等昧良喪心一至於此除已革提督博勒恭武由該大臣迅速查奏外岳州府知府廉昌巴陵縣知縣胡方穀岳州營參將阿克東阿均著先行革職交刑部按律速議罪名具奏蒲圻縣城存兵僅四百名賊眾大至以致失守知縣周和祥罵賊不屈被戕甚慘不愧守土之官嘉獎之餘實堪憐憫周和祥著賞加道銜照道員例賜卹並於蒲圻縣建立專祠以慰忠魂同時殉難之縣丞千總及陣亡之帶兵將備二員均著查明請卹並附於周和祥專祠以昭旌獎又據台湧奏荆宜施道文輝在白螺磯分防駐守不能督兵堵剿退離防所著徐廣縉常大洊查明參奏其餘退避各員弁並著查明分別參奏台湧著交部議處向榮計抵武昌福興玉山蘇布通阿等追剿之兵計

亦到齊徐廣縉著毋庸株守湘陰仍遵前旨兼程馳赴武昌一帶督率兵勇與常大瀄前後夾攻毋得再有遲誤岳州府城著羅繞典張亮基鮑起豹等酌量帶兵前往收復並撫綏難民毋令失所武昌下游朕已諭令陸建瀛統帶大兵泝流而上信陽以北復令琦善帶兵兼程前進會合兜剿並調集東三省勁旅前往接應誓必滅此羣醜以彰天討而快人心漢陽失守情形文武如何下落並著該大臣等查明迅奏傷亡兵丁照例議卹○諭軍機大臣等岳州爲南北咽喉該匪既紛紛竄去卽應趕緊收復著卽由湖南酌調文武大員往岳州駐紮分兵固守堵賊回竄之路萬不可再有疏失漢陽與武昌僅隔一江逆匪既踞漢陽則武昌更形危急省垣重地且爲南北關鍵四通八達之區所關甚巨著徐廣縉帶領南省追兵星速至漢陽武昌一帶合力攻剿常大瀄雙福當督

飭在城文武竭力守禦並與城外救援各將密商內外夾擊萬勿
株守城中一籌莫展致誤事機土匪晏仲武勾結逆賊圍搶餉鞘
該大臣業經派委鄧紹良等帶兵剿辦此股匪徒諒不難剋期殄
滅見在楚北軍情著徐廣縉隨時飛咨河南江西安徽江甯各督
撫準備兜剿三面圍擊不可任令竄逸復致滋蔓難圖台湧駐紮
荊州據江上游著一面擇要防守毋令全股賊匪竄入仍一面派
委得力水師兵船順江直下應援武昌毋稍遲誤廉昌等棄城而
逃情節可惡已命刑部按律治罪巴圖解餉如何被劫著查明參
奏通判鄭德基守備王福海尙能保護十餘萬軍餉送至省城不
至爲賊所掠著徐廣縉酌量保奏將此由六百里各諭令知之○
諭逆匪撲入漢陽沿江下游地方在在堪虞情形十分緊要已諭
令徐廣縉兼程前進迅速兜剿矣著陸建瀛酌帶江南水陸官兵

卽馳赴上游與徐廣緒常大洵等合力夾擊江防利用火攻務將
槍礮火箭火罐等件配帶齊全以期應用尤須派委得力將弁毋
得以庸懦濫充江蘇安徽江西一帶均當亟爲設備自固藩籬著
楊文定蔣文慶張芾遵照疊次諭旨妥籌布置互相應援至陸路
各要隘尤恐有土匪勾結並著一體嚴防毋致稍有疏失將此由
六百里各諭令知之○諭本日據徐廣緒奏賊匪北竄漢陽府城
失守督兵進剿等語楚豫交界地方最關緊要急應嚴密防堵著
陸應穀卽遵前旨親往要隘處所督飭文武員弁實力嚴防無任
賊匪闖入並著琦善兼程前進陳金綬亦卽飛催所調各路官兵
星速進行毋得稍有遲誤所有火器營官兵四十名火箭二千枝
並各旗營火藥二萬斤卽著琦善酌量差遣應用河南兵餉前已
先由戶部籌撥矣將此由六百里各諭令知之○甲戌諭軍機大

臣等張芾奏崇仁等縣會匪滋事委員馳往會拏一摺見在楚省逆匪未靖江西界連各處疊次諭令嚴密防堵稽察奸細此種會匪糾眾滋事經官兵緝拏膽敢持械抗拒且起有旗幟僞示等件難保不與楚匪勾結亟宜嚴拏懲治以免貽害見經張芾商同陳孚恩選撥兵勇派委文武各員前往勦捕辦理尙合機宜著卽嚴飭各委員等督率兵勇迅速撲滅毋任延蔓務將首從各犯悉數弋獲解省嚴行訊究從重懲辦將此諭令知之○乙亥諭內閣已革廣西提督向榮自抵廣西軍營節次勦賊獲勝雖間有挫衄而每遇接仗尙能身先士卒本年桂林長沙省城先後被圍向榮均有守禦之勞見在逆匪攻撲武昌亦經向榮先派常祿王錦繡帶兵赴援並親督兵勇追至蒲圻福興玉山蘇布通阿等皆出其後是向榮督兵勦賊雖未見成效究屬老於行陣臨事尙知機警該

員前因規避獲咎因念將材難得朕旋即加恩停其發遣命赴湖南軍前戴罪立功經徐廣縉派令總統諸軍昨又降旨剴切訓諭令會同蘇布通阿其籌剿賊事宜並諭徐廣縉將此旨宣示該員具有天良諒必知感知奮朕復博稽眾論皆以向榮屢保危城緩急可恃宜專委任以重責成與朕所見適相符合向榮即著免其發遣並賞還提督銜幫辦軍務提督以下悉聽節制迅即統帶大兵馳赴武昌解省城之圍並杜賊奔竄之路凡湖南軍營得力將弁並准酌量檄調來營以備差遣向榮經此次破格任用宜如何感恩圖報果能迅掃妖氛即可懋邀恩賞儻始終不知奮勉朕惟有執法從事決不姑容懷之勉之○諭軍機大臣等陸應穀奏請飭分守要隘等語南陽信陽相距六百餘里自應分路籌防鄭敦謹著即遵前旨赴信陽州一帶防堵其南陽一帶即著柏山專辦

琦善未到任以前所有籌防應辦事宜著陸應穀妥速辦理琦善陳金綬見已啟程到河南後應如何扼要駐紮及分撥調度進剿之處著琦善等體察情形相機籌辦總期內資保衛防剿兼施方爲不負委任將此由五百里各諭令知之○諭賊匪肆擾自粵而楚已逾兩載見復竄入岳州漢陽擾及武昌疊經降旨令徐廣縉統率大兵繞出賊前會同毗連各省之督撫三路兜剿因思賊起粵西沿途裹脅固多而首要各匪總以粵西爲巢穴大股出巢其老弱必不能悉數遠出且難保無渠魁踞巢爲黨與歸竄地步前據勞崇光奏鬱林賊匪剿除殆盡南太一帶亦漸就肅清而伏莽尙多若不及早搜捕恐貽後患著葉名琛勞崇光會同密查賊巢所在及賊匪餘黨合力搜捕毋令一名漏網其有縛獻賊黨者免罪其親族家屬縛獻者免連坐縛獻首要者予重賞或雜伏良民

之中紳士義勇及平民縛獻或密行報官者分別優獎並諭令地方官嚴查保甲勿因賊匪遠竄稍涉大意緝獲各犯嚴行審究首逆及著名賊目姓名有無僞託並飭屬密訪孽種墳墓見在何處盡行掘發以消逆燄而除戾氣將此由五百里各諭令知之○諭昨據徐廣縉查奏岳州失守情形與漢陽相繼失守當有旨令該大臣迅赴武昌一帶與常大瀘內外夾攻並令台湧一體設法應援矣細閱徐廣縉摺稱向榮出隊逼近岳州城內賊匪紛紛逃竄追趕二十餘里而岳州府縣如何下落仍未據探確實該大臣近在湘陰於逆匪突入岳州有無頭目在內其大隊係何匪督領竄出之後是否尙有餘賊在城占踞向榮一路追剿在後之福興玉山蘇布通阿等何以不將岳州收復賊既遠竄則文武員弁存亡應有確信何以仍無稟報且稱該匪大隊去遠何以又稱趕調弁

兵前赴岳州督剿是岳州之應否攻剿抑已收復該大臣尙無聞
見奏報均未明晰至漢陽相繼失陷並無月日及詳細情形究竟
見在逆匪分爲幾股其陸路由蒲圻咸甯與水路沿江而下之賊
作何分合係何頭目統帶武昌省城十二日被攻十九日報到至
今旬餘未得續報朕心焦灼難言逆首洪秀泉楊秀青馮雲山蕭
潮濱羅亞旺等是否確在賊營何賊分撲武昌漢陽見在賊衆多
寡漢陽城守文武如何下落該匪陷漢陽後是否又竄他處該大
臣統率全軍兼轄兩省自應通籌兼顧勿再遲緩失機著卽確查
一一具奏仍親督大兵由間道繞赴武昌下游險隘扼定該匪去
路必須水陸併剿勿令該匪再行奪險占踞仍與向榮渡江之軍
併力攻擊漢陽之賊琦善已馳赴河南陸建瀛亦派江迎擊該大
臣等三面攻剿定可立殄羣兇湖南賊匪與各縣小股土匪著責

成張亮基鮑起豹盡數搜捕並確探岳州賊匪如未盡竄卽嚴飭將弁趁其攻擾湖北之時趕緊兜圍迅速收復此舉最爲緊要湖北荊州一帶雖有台湧防堵尙覺空虛著羅繞典揀帶得力文武員弁兵勇馳赴襄陽與荊州水陸各兵表裏密防遏賊西竄俾不得由漢江北駛則徐廣縉向榮援救武昌漢陽之兵可資得力前任丁憂侍郎曾國藩籍隸湘鄉見聞在籍其於湖南地方人情自必熟悉著該撫傳旨令其幫同辦理本省團練鄉民搜查土匪諸事務伊必盡力不負委任雲南遊擊陳得功都司安如嵩著查明如未帶兵來楚卽咨該省督撫飭調來楚以資差遣連日據侍郎呂賢基太常寺少卿雷以誠條奏軍務各摺片多有可採之處著摘要鈔給該大臣等閱看將此由六百里諭知徐廣縉台湧羅繞典張亮基常大清略秉章並諭向榮雙福鮑起豹蘇布通阿福興

知之○是月給安徽鳳陽等四州縣浙江金華等五縣災民口糧貸湖南安鄉縣貧民麥種展緩兩淮富安等十四場被水竈地新舊額賦緩徵吉林三姓被水地畝上年銀穀江西南昌等五縣水災旱災地畝本年額賦並展緩新建等十一縣節年緩徵正雜額賦蠲緩河南永城等二十七州縣安徽靈璧等三十八州縣宣州等三衛山東滕嶧等六州縣濟甯臨清二衛浙江仁和等四十九州縣杭嚴等二衛湖南武陵等九州縣並岳州衛水災旱災風災雹災歉收地畝新舊額賦賑湖北公安等四縣被水災民一月口糧給坍塌房屋修費

十二月丙子朔諭軍機大臣等徐廣縉張亮基奏請由湖北設立糧臺一摺前因廣西賊匪竄出湖南降旨令湖南分設糧臺並命程喬采專辦糧臺事務見在賊由湖南復竄湖北該督撫等已派

衡永郴桂道張其仁帶員隨營前往所有軍營糧臺自應移設湖北惟此時武昌被圍徐廣縉駐紮尙無定所糧臺應設何處著徐廣縉常大瀄張亮基會同酌商辦理仍著程喬采前往總司其事務擇地安設兌收轉運均能便捷無誤各路支應將此由六百里諭知徐廣縉常大瀄張亮基並傳諭程喬采知之○諭張亮基奏訪聞長沙府屬之瀏陽醴陵益陽甯鄉寶慶屬之邵陽新化武岡辰州府屬之溆浦岳州府屬之巴陵平江臨湘澧州屬之安福永州府屬之道州東安永明江華衡州府屬之安仁桂陽州屬之臨武藍山均有土匪糾黨劫掠請假以便宜寬其文法及時懲辦等語昨據徐廣縉奏土匪晏仲武等謀劫餉鞘已派鄧紹良帶兵剿辦此股諒不難撲滅前有人奏瀏陽縣東鄉會匪周國虞等設立徵義堂名目意圖勾結已有旨飭令密查妥辦此項會匪蓄謀日

久人數眾多聞該縣知縣趙光裕素得民心是以伏而未動務須妥慎辦理不可稍涉鹵莽激成事端見在逆匪竄至湖北而湖南各屬伏莽尙多徐廣縉卽日馳往湖北著張亮基督飭各地方官酌量情形密速查辦有須發兵剿辦者分別辦理准其便宜從事一切不爲遙制惟各屬會匪潛滋日久此時查辦仍須各就地方情形察其輕重緩急或密與公正紳士妥籌次第酌辦俾要犯殲擒匪黨解散地方漸就廓清方爲妥善再據奏潮勇六千餘名近在河西不服約束肆擾鄉邨見已商同徐廣縉酌量裁撤隨營各勇每多恣悍不法節次諭令分別戛募安速遣散此項潮勇係何人管帶卽著徐廣縉張亮基嚴飭帶勇各員迅速解歸原籍仍須設法資遣彈壓勿令沿途滋事爲要將此由六百里各諭令知之

○停運湖南湖北被擾州縣本年漕米○丁丑諭內閣本日據陸

應穀馳奏湖北賊匪情形一摺逆賊於十一月十三日攻陷漢陽府城旋即占踞江面直撲武昌見在向榮已趕至離江夏十里地方追勦大獲勝仗殺賊二千餘人福興玉山蘇布通阿等統帶大兵計已次第趕到著徐廣縉卽督率諸將迅掃賊氛向榮經朕破格任用並假以事權提鎮以下悉聽節制自當愈知感奮趁此聲威痛加勦洗遠解省城之圍並杜賊紛竄之路陸建瀛琦善南北兩路已令進兵合擊至各省紳士朕先後降旨命羅繞典陳孚恩曾國藩等於本籍湖南江西幫辦防剿事宜其餘各省在籍紳士值此賊匪肆擾之時諒必志切同仇爲民捍患著該督撫傳旨令該紳士等各就該地方情形幫同團練保衛鄉閭或用堅壁清野之法使賊不能掠擄偏脅一切布置經費應由公正紳士籌辦不得官爲抑勒致滋流弊該督撫等惟當遴選賢能之員與各紳民

同心協力嚴緝土匪密拏奸細以杜句串被賊裹脅窮民皆吾赤子尤當分別良莠予以自新有能殺賊立功自拔來歸或殲賊首者立即奏明優加恩賞朕宵旰焦思誓必殄此羣兇綏我黎庶封疆文武大吏其各仰體朕心毋負委任將此通諭知之○諭軍機大臣等候補四品京堂勝保奏江南省城亟宜扼要設防一摺見在逆匪竄入漢陽沿江一帶防禦喫緊江南省城尤爲重要必應籌備嚴密乃可杜賊匪之覬覦著祥厚陸建瀛楊文定霍隆武文藝按照所奏妥速籌商無論駐防綠營水師陸路各官兵遴派得力將弁一體勤加操演務令悉成勁旅以衛省垣並於江岸上游擇要嚴防扼賊東下之路至逆匪所到輒先有奸細潛來窺探尤當嚴密盤查審明後卽行正法以杜句引其紳士人等莫不自顧身家著遴選公正明幹之員令其自行團練互相保衛如有實心

任事於地方有益者隨時奏請優加獎勵所需經費出於樂輸毋許地方官藉端勒派致滋流弊其淮徐各處每有匪徒匿迹並著認真訪查嚴行緝捕免致勾結爲患原摺著鈔給閱看將此由六百里各諭令知之○諭陸應穀馳奏賊匪竄踞漢陽府城將漢口及江面用船搭造浮橋圍住武昌省城湖北應山以下孝感黃陂黃岡等處驛路梗塞見由應山縣將夾板文報退回另由新野遞至襄陽等語豫省防堵此時甚爲喫緊著琦善速卽兼程帶兵前往河南湖北交界處所擇要防剿萬勿遲延琦善未到以前著陸應穀盡心妥籌毋稍貽誤至湖北文報旣由該署撫改道飛進卽通飭各該州縣改設驛站小心遞送毋致遺失遲誤將此由六百里各諭令知之○諭前因河南防堵緊要已有旨諭令該督撫等將前調陝甘山東山西等省官兵迅派得力將弁管帶馳往河南

聽候調遣茲據陸應穀奏賊匪竄至漢陽逼近河南請飭催鄰省官兵迅速赴豫一摺著舒興阿張祥河李德郭夢麟迅飭帶兵將弁管帶前調精兵星速馳赴河南以資防剿毋稍遲誤將此由五百里各諭令知之○禮部以明年元旦太和殿筵宴禮節請得旨停止○兩江總督陸建瀛等奏壩工慎重進占趕辦引河情形得旨妥速辦理斷不准不肖工員因總督遠離藉端遲延以爲冒銷地步儻有似此者卽據實嚴參朕必從嚴懲辦不止枷示河干將此意可曉諭在工員弁知之○追封 皇后父原任工部郎中穆揚阿一等承恩侯母宗室氏侯妻一品夫人生母姜氏晉封侯妻一品夫人○命候補四品京堂勝保馳往河南交琦善差遣委用○命協領台斐音保巴揚阿等管帶吉林黑龍江兵各二千名赴河南交琦善調遣○戊寅諭內閣許乃普奏請設立行營監察御

史一摺近來軍營奏報不實疊經降旨嚴切訓誡惟在統兵大臣及各督撫等力除積習認真查察其蒙混掩飾者立即據實上聞嚴參治罪自可杜軍營捏報等弊該學士請設行營監察御史雖爲嚴查欺飾起見惟該御史既不能身歷行間目覩勝敗稽查採訪僅據傳聞儻所聞或有不實遽行入奏不但多所牽制轉恐有誤事機其統兵大臣及該督撫等皆朕特簡若以爲盡屬可疑豈行營監察御史之言盡屬可信邪所奏著毋庸議○諭刑部奏遵議失守岳州府城各員罪名一摺已革湖南岳州巴陵縣知縣胡方穀岳州營參將阿克東阿於賊匪未到之先輒自逃散以致府城失守較之被賊攻圍不行固守而輒棄去者情罪尤重均著照部議卽行處斬以昭炯戒已革岳州府知府廉昌係同城知府先行逃出卽照部議應斬著監候秋後處決著賈等尙無下落著徐

廣緒等迅卽查明遵旨辦理○諭軍機大臣等蔣文慶馳奏軍情
緊急請迅催援兵一摺安徽奏調防兵業經陸建瀛奏稱於松江
等處酌調水陸兵二千名赴皖其餘一千名由安徽本省各營酌
調茲復據蔣文慶奏待援緊急自係實在情形著陸建瀛再行撥
兵一千名迅速派員馳赴皖省交該撫酌量分撥壽春鎮總兵恩
長卽留於該省與該撫會商籌剿陸建瀛著仍遵歷次諭旨兼程
馳赴九江上游擇要駐紮遏賊東下之路儻於九江一帶截擊則
皖省亦可保無虞該督統轄三省諒必兼權緩急不分畛域迅速
籌辦該撫亦須剴切曉諭居民勿令驚惶遷徙是爲至要調任贛
州府知府陳景曾著留於九江辦理防堵事竣再赴調任有人奏
九江官兵分布官牌夾瑞昌馬頭小池口胡家埠等處實非要隘
不若直趨上游與湖北守兵共守道士袱牛肝磯各隘口尤爲扼

要等語並著該督等體察情形因地相機酌量妥辦將此由六百里各諭令知之○諭有人奏見在賊匪滋事聲息四路潛通湖北夏間卽有僞示直隸山東山西等省亦有之急宜嚴防奸細內應等語近來盜賊橫行毫無忌憚往往潛聚多人乘機竊發見當楚氛未靖難保無奸細暗中潤入如果地方官查拏嚴密自足以寒賊膽而消逆萌儻仍積習相沿規避處分必致養癰貽患著訥爾經額李德郭夢齡嚴密飭屬隨時畱心訪查如有形迹可疑之人設法盤詰從重懲治不得稍有疏懈至沿途驛站見當軍報來往喫緊之際尤宜認真整頓不可視爲具文將此各諭令知之○徐廣綰奏臣接據漢川縣報稱賊於漢陽之大別山及漢鎮均經紮營占踞又於襄河之小河口謝家嘴等處搭造浮橋並於武昌之塘角泊有船隻連亘數里勢甚猖獗聞之不勝憤懣查常祿王錦

繡之兵已馳抵省城向榮等各隊大兵亦陸續到齊併力夾擊臣又飛派蘇布通阿督帶川兵迅速渡江由上游漢沔等處一面截堵一面分防趕緊將此股掃滅庶可鎮定人心至各鎮將追剿不力種種貽誤誠如 聖諭飾詞稟報一味耽延臣查賊於十月十九日竄出其防東路之和春秦定三李瑞經文岱王錦繡常祿等並由臣檄調忽於二十一日帶兵齊赴湘潭臣以賊已西竄何以兵轉南來當卽申飭令其拔隊緊追並慮及匪必東竄岳州喫緊臣探聞匪至益陽卽知會向榮派兵往堵隨又札飭和春秦定三李瑞經文岱瞿騰龍由小路馳往大荆攔截以防匪竄岳州乃該總兵等於二十八日接札初三日始抵大荆而賊匪已於初二日竄過實屬有意遷延讓賊北竄其大隊追剿之兵惟向榮尙知愧奮繞道前行其餘將弁均不免遲延觀望尤可恨者福興所帶東

兵向來尙稱得力自歸該提督統帶頓染惡習一味推諉不前臣
前因查察未晰且以用人之際若概行參奏又恐統帶無人致涉
遲疑昏愊糊塗罪無可追見在調集兵勇趕緊將巴陵一帶土匪
剿滅卽行確探賊蹤前往督剿斷不敢再爲遲滯孤負 聖恩自
干嚴譴 上諭據徐廣縉馳奏軍營近日情形一摺覽奏曷勝憤
懣不料軍營將弁以及地方文武膽玩至於此極該大臣身爲統
帥正當用人之際雖不能概行參奏亦當擇尤懲辦以儆將來岳
州府城賊旣竄出見在是否收復何以並未奏及該府爲兩楚咽喉
此時趕緊據守尙可杜賊回竄之路巴陵臨湘一帶土匪自應
迅速殲除該大臣旣不能卽赴武昌亦豈可置之不顧若有疏虞
關繫甚重昨已降旨命向榮幫辦軍務假以事權亦必須有重兵
俾資調遣福興玉山等曾否帶兵趕到據稱蘇布通阿督帶川兵

渡江堵截是否能與向榮聲勢相援向榮著卽酌量情形相機布
置武昌近日文報不通糧儲匱乏必須及早解圍或分兵渡江攻
取漢陽亦可以分賊勢向榮旣經幫辦軍務節制各師卽當申明
紀律嚴定賞罰以振軍威萬不可再蹈從前積習徐廣縉見尙未
抵武昌軍營一切情形卽著向榮隨時奏報以慰懸念見聞道路
梗塞務須改設驛站以通軍報南北兩省被賊地方查無下落之
微末員弁及地方生監中有無從賊之人著徐廣縉等分別訪查
奏明究辦翰林院編修蔡壽祺陳奏時務數事並著鈔錄交該大
臣閱看採擇辦理將此由六百里加緊諭令知之○調蘇敬衡爲
福建按察使以黃樂之爲浙江按察使由山東鹽運使遷○己卯諭內閣
昨據徐廣縉奏軍營近日情形一摺據稱十月十九日賊自長沙
城外西竄時防堵東路之和春秦定三李瑞經文岱王錦繡常祿

等未奉檄調忽於二十一日帶兵齊赴湘潭當卽申飭令其拔隊緊追隨又札飭和春秦定三李瑞瞿騰龍由小路馳往大荆堵賊竄往岳州之路計程不過二百里該總兵等於二十八日接札初三日始抵大荆賊已於初二日竄過實屬有意遷延其大隊追剿之兵惟向榮尙知愧奮繞道前行餘皆遲延觀望提督福興統帶廣東官兵一味推諉不前見在派往堵剿之各鎮將除向榮外其餘並無稟報等語覽奏各情形實出情理之外不料軍營將弁以及地方文武膽玩至於此極徐廣縉身爲統帥節次諭令如有抗違軍令者卽將朕賜過必隆刀以軍法從事乃以人數較多礙難概行參奏自認昏愎糊塗於事何濟此等將弁喪心昧良可惡可恨卽盡予斥革治罪亦屬咎由自取惟見值派委追剿賊匪之時若令置身事外轉得遂其貪生畏死之私除王錦繡常祿帶兵救

援武昌見已馳入省城守禦姑從寬貰外福興有心推諉厥咎尤重著先行革職畱於軍營交向榮差遣委用戴罪自效和春秦定三李瑞經文岱瞿騰龍均著先行革職畱任仍責令勦賊以觀後效朕思軍營積玩惡習皆由該大臣等含忍姑容復代爲彌縫以致號令不行毫無忌憚見在賊氛肆擾兩楚地方吾民顛沛流離死者不知凡幾卽將弁兵丁出力打仗者亦傷亡相繼而若輩仍復逍遙觀望自便身圖縱寇殃民實堪痛恨若不按律懲辦何以除銅習而振軍威嗣後該大臣等均當申嚴紀律如再有玩誤軍令不遵調遣及帶兵藉詞遷延縱賊竄擾或守土文武遇賊棄城逃散者卽一面奏聞一面先行正法昨刑部議奏失守岳州文武罪名已降旨將知縣胡方穀參將阿克東阿卽行處斬知府廉昌亦定爲斬監候該大臣等卽傳諭軍營將士及地方文武等力洗

前愆其圖振作儻仍因循不悟阿克東阿等卽前車之鑒勿謂國典可倖逃也將此通諭知之○諭前命徐廣縉由湖南間道疾趨武昌以解省城之圍並命陸建瀛泝流直上扼守九江上游琦善統帶重兵兼程前赴楚豫交界三面合剿連日據各路奏報向榮已抵江夏地方與賊接仗獲勝其餘鎮將統帶大兵已由南路次第赴援惟北路及大江迤東尙恐不能兼顧陸建瀛琦善以鄰省督撫分路赴楚會剿不免限於疆域未能號召諸軍會籌夾擊著頒發欽差大臣關防兩顆分交陸建瀛琦善祇領陸建瀛卽督率水陸官兵馳赴大江上游飭屬將各險要妥爲防守卽可直趨楚省應援武昌琦善計已早過保定所有前調官兵迅卽催赴河南將汝南光等處要隘布置防守仍卽統兵出境進攻與湖北向榮等所帶大兵合力兜剿徐廣縉卽當親赴武昌一帶與陸建瀛琦

善水陸兜圍萬不可各存意見致誤事機見在兵力不爲不厚軍餉不爲不充該大臣等經朕特簡務期同心勦力迅奏膚功毋負委任○諭軍機大臣等昨據徐廣縉奏軍營將弁及地方文武膽玩情形已有旨令擇尤懲辦本日復明降諭旨將福興革職和春等革職畱任矣逆匪猖獗疊陷城池朕以徐廣縉總制兩粵素有威望特命爲欽差大臣並署理湖廣總督勦辦賊匪是朕之倚畀甚殷乃因鎮將不遵調度輒請另簡重臣豈身任兼圻尙不得爲重臣邪當此防勦喫緊之際軍情旦夕變遷又何能遽易生手更致呼應不靈頃命向榮幫辦軍務仍補授廣西提督不特向榮當知感奮力圖報效卽該大臣亦得指臂之助但須同心合力嚴申紀律督率諸軍迅勦羣醜又何必遲疑退諉另請簡員邪所有湖南湖北兩路勦賊事宜卽責成徐廣縉向榮二人專辦本日復明

降諭旨頒給陸建瀛琦善欽差大臣關防所有江蘇安徽江西毗連湖北各要隘責成陸建瀛妥爲布置仍令於上游扼要堵剿其河南各要路卽責成琦善帶兵進攻琦善昨已啟程著仍遵前旨兼程前進勿稍延緩朕所以命陸建瀛琦善爲欽差大臣者以湖北賊勢猖獗當其下游則江西等省最爲喫重防其北竄則河南信陽新野一帶亦甚緊要不但自固藩籬必當出境合剿該大臣等膺此重任務宜度地相機互爲聲援密行札商約期會剿三路併進賊縱狡獪亦有接應不暇之勢前之被賊牽制者今卽以之制賊徐廣縉等雖各分各路所辦實一事斷不可稍存疆界之見總期勦力同心聲勢聯絡若何路致賊竄逸朕惟何路大臣是問果能出奇制勝迅奏膚功朕必加以懋賞克膺殊眷若但知設防不圖進攻鄰省設或有疏虞本境亦豈能自固老師糜餉伊於胡

底該大臣等接奉此旨其各體朕意和衷共濟懍之勉之將此由
六百里加緊各諭令知之○庚辰命正黃旗蒙古副都統明慶帶
領吉林黑龍江兵赴河南聽琦善調遣○陸應穀奏據署睢州知
州鹿傳洵稟報太和亳州匪徒結捻百餘人竄入鹿邑縣境滋擾
當卽獲犯二名復經歸德府飭營協拏並飭鹿邑等各縣營分投
追緝趕至甯陵縣境匪徒恃眾拒捕卽經兵役放槍轟斃多名餘
匪竄至商邱乘船向東逃逸查江南捻匪陳四與虞城縣民耿金
豹挾仇糾眾尋毆業經將陳四拏獲並獲夥犯多名解省審辦此
股匪徒卽係陳四案內餘黨臣先經訪聞嚴飭查緝乃該匪膽敢
復行糾捻滋擾實屬目無法紀當卽嚴飭歸德府督同各州縣營
汛選派兵役實力追捕並咨江南安徽山東飭屬一體會拏務
期悉數弋獲見在南陽辦理防堵歸德捻匪滋擾則在省之東路

臣若卽行出省誠恐省城人心驚惶止可在省鎮靜彈壓並將應辦事件次第料理仍俟新調大兵到後如署撫臣琦善尙未來豫屆時臣再馳赴南陽等處相機調度得旨南陽等處更屬緊要該處若有巡撫駐紮藉可稍定民心免致相率遷徙料汝欲往彼去時琦善已可到省矣○辛巳禮部尙書何汝霖卒贈太子太保子祭葬諡恪慎並賞其孫承禧舉人○以徐澤醇爲禮部尙書慧成署四川總督福濟爲河東河道總督由奉天府府尹遷○壬午諭內閣給事中金肇洛奏兵差騷擾愈甚請飭嚴查一摺近年賊氛不靖疊次命將出師原期除暴安良屢經降旨令帶兵各員嚴加約束不准兵丁沿途滋擾若如該給事中所奏官兵需索車馬酒食干把總以上等官酒席之外又有程儀及另折車價船價各名目沿途訛索有增無減稍不如意則百般陵辱甚至任意逗遛不肯出境

偏合該省督撫參辦州縣以致地方苦累民不聊生此等惡習總由帶兵各員不能身爲表率兵丁效尤亦無忌憚若不嚴行約束何以整飭戎行著統兵大員嚴飭將弁徧行曉諭兵丁經過地方於例外絲毫不准騷擾並著各督撫飭令該州縣按例支應催令前進如有前項弊端卽將滋事官兵指名稟報由該督撫奏聞扣畱訊究卽照軍律嚴行懲辦至此次所稱古北口兵行至良鄉卽將該縣所備食器摔碎桌凳燒毀幾致延燒房屋一節著訥爾經額迅卽查明具奏毋稍徇隱將此通諭知之○直隸總督訥爾經額等奏見調直隸各兵由琦善督催前行續到官兵卽由陳金綬管帶得旨琦善見已授爲欽差大臣軍中有所統率自可相機調度一切應緩應急朕斷不遙制陳金綬忠誠素著勇敢無敵戰陣之事可與商酌見在營員中經戰者甚少大半皆怯懦之人陳金

經雖精力未衰究不宜仗仗在前朕不放心殲茲羣醜在此一舉朕惟有竭誠籲天以消民劫也此旨著寄與琦善陳金綬看○癸未諭軍機大臣等賊匪紛竄湖北疊經降旨令徐廣縉繞出賊前截剿自十一月十九日常大瀉雙福馳奏武昌被圍十分危急迄今已屆兩旬未據該署撫續將情形入奏而徐廣縉本月初三日所奏有武昌可保無虞一語省垣防兵及續到官兵僅五千餘名雖向榮各隊陸續趕到而賊燄方張未識能否制勝朕心懸繫晝夜焦思徐廣縉接奉疊次諭旨尙未馳抵湖北扼要駐紮武昌是否解圍豈竟毫無消息見在賊勢如何大兵是否到齊如何進剿省城是否可保無虞毗連各境有無竄匿著徐廣縉迅卽查明詳細具奏以慰朕念向榮已補授廣西提督著卽將馳抵武昌連日進剿及省垣守禦情形漢陽水陸各要隘是否均有賊擾見在

如何籌辦一面知照徐廣縉一面專摺具奏無稍遲延本日據陸應穀奏前調陝甘赴楚官兵三千於十一月十一日全數出河南境見在已到湖北若干未到者屯聚何所著向榮妥爲布置切勿置之無用之地或被賊匪假辦勇兵濶入我軍又致墮其詭計前據台湧奏荆宜施道文輝稟報有聞常德被圍之語該大臣何以並未奏及荆襄一帶亦甚緊要見在如何設防萬勿大意將此由六百里各諭令知之○甲申諭內閣翰林院侍講汪振基奏崇儉節用一摺量入爲出制用之大經近年以來楚粵軍餉豐北工需用多在此常年經費之外而各省水旱偏災經朕隨時加恩蠲免歲入之數又復不能如額自應出入相權力籌通變著戶部會同內務府大臣通盤籌畫詳查歷年動用條款成案逐細鉤稽除萬不可省者仍按舊章辦理外其餘應行撙節之處卽分別酌議裁

減具奏以昭覈實而裕度支尋奏內外各衙門用項歷經酌覈裁減見在均係萬不可省之款惟內務府辦理雜物擬請以銀錢各半發放每銀一兩折給制錢一串五百文從之○徐廣縉奏臣查大營兵勇全赴武昌逆匪於十一月十三日到武昌城外東南西三面俱紮有賊營又於長虹橋隔港屯踞以阻我進剿之兵向榮趕到後紮營於白木嶺十七日親督頭隊由長虹橋直抵賊營開放槍礮該逆分隊抗拒和春秦定三李瑞之兵亦卽出隊分投攻擊從辰至未轟斃賊匪多名斬獲數十名兵勇亦陣亡二名受傷四十餘名至巴陵一帶土匪亟須剿洗當派阿勒經阿鄧紹良帶兵攻剿並派知府江忠源帶楚勇協剿查得黃復灘梁夫峴隆奉菴等處均係賊巢該員逐一搜捕並將匪巢燒燬鄧紹良等在新牆紮營步步進逼斃賊甚多擒獲要匪趙捷權等四名均係晏仲

武死黨曾受洪逆僞職二十四日督兵逼近賊巢駐紮二十五日
阿勒經阿鄧紹良督率兵勇分三面進攻並豫派遊擊鮑雲翥駱
永忠等帶湖北弁兵鈔由賊巢後山梁壓下我兵行抵該處對準
賊巢開放槍礮一鼓齊進擊斃黃衣賊目餘匪紛紛倒地兵勇乘
機焚燒賊巢房屋眾匪慌亂竄逃當被大兵砍斃無數生擒賊匪
晏七等五十七名惟時首匪晏仲武已改裝逃遁當經遊擊駱永
忠都司許連城等奮力追捕至紅橋地面拏獲訊供該犯於道光
二十八年卽在廣西投楊秀青入會曾授僞提督之職訊明後恭
請 王命處以極刑餘匪分別梟決此次剿洗土匪員弁尙能出
力可否容臣酌保數員以示鼓勵 上諭逆匪圍撲武昌向榮趕
到後駐紮白木嶺福興玉山蘇布通阿馬龍等續到之兵徑趨武
昌東門十一月十七日向榮親督頭隊由長虹橋直抵賊營開放

槍礮該逆分隊抗拒和春秦定三李瑞等分股攻擊羈斃賊匪多名斬獲數十名見仍分路進剿惟陸路固須進攻水路尤宜嚴防經徐廣縉飭令蘇布通阿帶兵過江遏其上竄荆襄之路並咨兩江督撫將上海所造舢板等船駕赴九江以阻匪船東下該大臣等卽督飭鎮將相機進剿迅解武昌之圍分路接應毋令水陸紛竄至巴陵土匪晏仲武等經徐廣縉派阿勒經阿鄧紹良江忠源等帶領兵勇剿辦江忠源先接獲匪黨四十四名並將匪巢燒毀阿勒經阿鄧紹良等復分三面進攻斃黃旗賊目生擒晏七等五十七名奪獲槍礮器械多件匪首晏仲武經遊擊駱永忠都司許連城等擊獲該匪等均受僞職爲賊後應罪大惡極業已明正典刑埽其巢穴該大臣卽統帶重兵前進將臨湘補圻一帶土匪乘勢剿洗直抵武昌與向榮等迅殄羣醜毋稍延緩此次剿辦土

匪出力員弁著酌保數員候朕施恩毋許冒濫○諭軍機大臣等
向榮已抵武昌與福興和春等所帶各兵分股夾擊計此時又閱
兩旬該大臣定遵疊奉諭旨馳赴湖北親督各路官兵與向榮會
籌攻剿省垣被圍日久内外文報不通不堪再事遷延向榮業經
趕到武昌直抵賊營著與諸將妥籌速剿當接仗獲勝之後士氣
倍奮務須趁此機會竭力殲除能與城內拒守官兵出奇接應水
陸兩路節節設伏要擊不令該匪順流下竄尤爲周密軍情變遷
不一全在該大臣與向榮等勦力同心相機辦理迅速布置朕斷
不爲遙制前有旨令蘇布通阿與向榮合力勦賊嗣據該大臣奏
稱欲令其渡江遏賊竄往荆襄之路不知此時如何調遣總當察
度緩急毋誤事機前諭羅繞典馳赴荆襄扼要駐守此時曾否接
到諭旨前往台湧督防荊州西路能否兼顧該大臣須通盤籌度

不可顧此失彼本日據張芾奏請將福建調到官兵三千名仍令由江西繞出九江上游杜賊東竄等語所奏不爲無見見在賊匪擄掠船隻甚多奔突靡定該大臣由南路進剿琦善由北路前進該匪被剿順流東竄則湖北黃蘄江西九江等處最爲喫重昨已命陸建瀛由九江泝流直上此項官兵該大臣正可與之熟籌分布蘄黃以下水路要隘萬不可令賊奪險東下又滋蔓延開隆阿業由江西遵旨折回湖北該侍衛係吉林人若令管帶吉林官兵較可得力該大臣卽飭該員前赴河南交琦善酌量差遣委用至巴陵餘匪如安仁之李能通監利之張添佑及湖南地方各股零匪卽著督飭地方在事文武實力搜查淨盡務絕根株不畱餘孽爲要將此由六百里各諭令知之○乙酉命墨爾根副都統烏凌額等統領黑龍江馬兵赴河南聽琦善調遣○丙戌諭軍機大臣

等朕聞逆匪見踞漢口爲巢穴於江面上下搶掠船隻搭造浮橋
兩座直接湖北省城以通往來復於武昌城外屯紮賊營數處作
攻圍之計昨據徐廣縉奏稱陸路之匪僅係分股其大股全在水
路我兵卽能殲除陸匪亦仍無補是賊匪勢甚猖獗而我兵進剿
是否能制賊死命尙無把握因思賊匪大股雖在水路而其巢穴
俱在江北我軍約在江南若一面援應省城一面遴選精兵由沔
陽間道至孝感黃陂潛出漢陽之後直搗巢穴前後夾擊亦出奇
制勝之舉著徐廣縉向榮體察地方情形如可照辦迅卽派提鎮
大員帶兵繞道密速前往既可安置驛站與河南聲勢聯絡且可
杜賊匪竄援之路惟軍營情事變幻不常向榮及領兵各大員務
須隨時察看緩急大江南北兩岸並上下游要隘均宜兼顧逆匪
大股既在水路亟應設法火攻並先焚其浮橋截賊爲二使其首

尾不能相顧並隨時密咨陸建瀛會同夾擊互相策應再襄陽荊州一帶係陝豫兩省門戶最關緊要前已諭令羅繞典前赴防堵此時曾否馳往殊爲懸繫著卽酌帶官兵與台湧會籌辦理並與河南南陽駐守帶兵文武大員及陝西接壤處所隨時知照聲息相通互爲接應不可稍分畛域致誤事機武昌被圍多日常大瀆等久無奏報朕心焦灼寢饋難安向榮已授廣西提督兼幫辦軍務著卽將湖北省城及軍營近日情形一面知照徐廣縉陸建瀛琦善等一面隨時奏聞以慰朕念驛站文報尤須設法妥遞萬不可爲賊所得致漏軍情自十一月十一日以後所有寄該大臣等各諭旨日期著鈔單給閱曾否陸續接到有無遺失之處著徐廣縉等按單查明具奏將此由六百里諭知徐廣縉向榮並諭令羅繞典台湧知之○諭逆匪紛竄湖北圍撲武昌疊經諭令陸建瀛

兼程馳赴九江上游一帶迅籌江防遏賊東下之路並頒給欽差大臣關防復命戶部先撥庫帑銀三十萬兩以濟軍需見在該大臣行抵何處水陸各要隘如何設防文武員弁所用何人諒已一一籌辦刻下武昌驛路阻隔兼旬之久常大瀄等並無奏報朕心焦灼寢饋難安本日已寄諭徐廣縉向榮等趕緊進攻速解省城之圍並催令羅繞典迅赴荊襄等處與台湧防堵西北上游惟賊匪擄船甚多若被勦順流東竄則江西安徽等處萬分喫重陸建瀛前已計及於九江水陸上游扼要布置著卽迅速馳往將籌勦各事宜由六百里馳奏以慰朕懷該匪見踞漢陽將武昌漢口俱搭浮橋三面接應省城勢甚危急向榮等援兵先後已到武昌若能渡江直搗賊巢水陸並進陸建瀛張芾等復於九江上游要隘派兵前後夾擊使賊首尾不能相顧自可一鼓成擒儻逆匪捨船

登岸分擾黃州一帶則陸路與安徽接壤處處可虞亦必須先期擇險設伏要擊方能互相策應若賊匪下竄黃蘄一帶我之水師既須防其火攻且可設法用火燒賊船隻或倣古人柴荻灌油繫走舸船尾之法行之但必宜暗藏港汊俟賊船過後繞出上游順流乘風方可得手陸建瀛於楚北水陸地勢素所深知著卽通盤籌畫與徐廣縉向榮互相知會協力同心殄此醜類毋得稍分畛域致誤事機將此由六百里諭令知之○安徽巡撫蔣文慶奏探聞粵匪見踞漢陽漢口爲巢穴於江面上下游搶擄船隻搭造浮橋直接湖北省城以通往來復於省城屯紮賊營作圍攻之計匪勢日形猖獗見在九江已有陸建瀛督帶水師扼守萬一該逆從黃州陸路下竄甚爲可慮查鄂省北界河南南界江西河南之信陽州有平靖關天生險隘聞已派兵守禦逆匪勢難北竄江西有

九江屯駐重兵扼守足以制南竄之路惟東過黃州數百里內無險可扼刻下黃州居民早已遷徙一空賊匪豈無偵探乘虛直竄是其長技與黃州緊接者爲安徽如英山霍山太湖宿松等縣處處毗連卽就宿松一縣言之連界共有八處四處尙有山隘可守其餘四處皆一路平衍不能不分兵防禦而省城根本重地又豈能全不設備小孤山爲水路入皖門戶形勢原屬可恃無如冬令乾旱江渚悉成平壤賊若舍舟登陸由北岸則直抵安省由南岸則遙連江南安得如許重兵層層堵截臣愚以爲賊匪由粵西以至湖南湖北本省尾艸有兵鄰省防堵有兵而賊蹤所至立即潰陷者無他由無重兵鈔出其背故也惟有徐廣縉急分大兵一萬名由湖北沔陽州間道以至孝感黃陂潛出漢陽之後上游有徐廣縉督帶大兵圍剿武昌漢陽下游又各有重兵堵截迎擊先焚

浮橋以斷漢陽往來之路截賊爲二使其首尾不能相顧庶可一鼓蕩平矣得旨陸建瀛諒已馳抵安慶該撫卽會同籌商省城尤當扼險防守毋任該匪竄入○欽差大臣琦善奏賊情叵測請稍寬時日再籌進攻得旨觀汝此奏太覺顛預存心若此豈不有負委任已有旨諭汝矣○山東巡撫李德奏據署郯城縣知縣李啟昌等稟十月二十八日在江省沐陽縣境內搜獲匪犯姚廣明等七名二十八日訪知匪眾在蘭山費縣交界處潛匿分帶兵勇馳往勦捕該匪逞兇抗拒經該文武各員奮勇圍勦殲斃匪犯史大等三名擒獲丁自省等八名遊擊王鳳祥等會同蘭山縣知縣張應翔擒獲張池節等十三名十一月初三日李啟昌等訪知匪蹤追至沐陽縣境內擒獲匪犯龐經臣等九名初八日又在沐陽嶺遷等縣境內搜獲匪犯于計彩等十名十一日又搜獲匪犯李馨

化等三名十六日李啟昌等追捕至宿遷沐陽等縣境內拏獲匪犯范秉須馬和尙八名共計先後獲犯八十五名格殺六名查訊各犯籍貫非隸東省卽隸江省總在兩省犬牙相錯之處出沒爲患此次該文武各員跟蹤追捕獲犯多名辦理尙知認真臣見飭該府縣就見獲各犯窮追夥黨按名偵捕務將首惡兇匪悉數殲除報聞○丁亥諭內閣扎拉芬奏等奏喀爾喀賽音諾顏扎薩克圖汗兩部落汗王貝勒貝子公扎薩克台吉呼圖克圖等情願捐銀以備軍需呈請代奏請旨一摺喀爾喀賽音諾顏扎薩克圖汗兩部落汗王等聞匪徒肆逆呈請捐銀一萬八千兩忠悃出於至誠朕甚嘉悅但軍營應需銀兩見已措備足敷支用且念蒙古人等生齒日繁藉資生計所捐銀兩毋庸賞收用示朕加惠蒙古人恤世僕之至意○諭軍機大臣等昨據琦善奏請稍寬時日再行

會合兜剿等語覽奏太覺顛預殊失朕望此次逆匪占踞漢陽圍困武昌兼旬以來未接常大瀆奏報徐廣縉自南而北水陸中途賊匪星羅碁布既以道路梗阻未能迅抵鄂垣陸建瀛沂流上行勢又不能疾駛該匪往來漢江南北無所顧忌設任其到處衝突則楚豫壤地毗連難保不潛謀滋擾况應山孝感黃陂一帶皆有賊營見在文報不通豫界防剿正當喫緊之時即使北路賊蹤稍遠而武昌爲心腹重地稍有疏虞便難措置所以特命琦善與陸建瀛等均爲欽差大臣以便會合剿辦在琦善經朕棄瑕錄用方將大加委任卽盼迅奏膚功殄茲羣醜在此一舉乃該大臣自二月二十七日出京本月初五日始由保定啟程似此緩轡徐行將何日始抵豫省邪軍情緩急朕原不必遙制而道里遠近行程遲速豈不可以逆計各路調集官兵一時本難到齊但應催令迅速

前來毋許沿途逗遛該大臣卽當星馳先抵豫楚交界將各州縣形勢險要與見在防守情形一一察度其分派各屬之文武員弁如有不能得力應行更調之處沿途亦可察訪到彼後更可面詢機宜是否可用非在直隸境內所能周知布置者卽以河南一省而論存兵亦尙不少朕先經徵調直隸陝甘兵六千名赴河南防剿經該大臣奏請添兵籌餉復增調兵一萬數千名均交調遣試思專辦豫省防堵應需兵如此之多邪楚豫脣齒相依楚省得安則豫省之藩籬自固若心存畛域但以聊固吾圉爲謀則賊氛所至將有不堪設想者該大臣豫爲先固藩籬之計正當迅速前往將先到各兵揀選驍勇將弁管帶親自統率越境進攻其在後各兵陸續趕到正可以壯聲威陳金綬如尙未入豫境卽飛檄飭令帶兵先行毋稍遲滯行軍原貴愼重但非遲緩之謂趁此賊眾蟻

聚武漢之間尙未四竄該大臣與徐廣縉陸建瀛三人所辦實係一事無論何人先行趕到先行設法籌攻何人首先破賊擒渠策勦當居第一若坐視不救國法難寬爵賞斧鉞朕惟功罪是視不稍寬假亦無所吝惜也朕日夕焦勞不安寢饋何暇再寬時日爲該大臣等諉卸地步所有一切事宜著迅速密籌妥辦先行由驛馳奏毋許稍有遲緩將此由五百里諭令知之○諭前有旨令舒興阿張祥河派委明幹大員前赴陝西湖北交界地方扼要防守續據張祥河奏遵旨相機妥辦見在逆匪攻撲武昌益形猖獗所有東南北三路疊派欽差大臣徐廣縉陸建瀛琦善各帶重兵分道進剿深恐該逆被創西竄則襄陽間道可以直達商州其鄖西鄖縣竹山竹谿等處路徑叢雜隨處可通興安之白河洵陽平利以及鎮安山陽商南等縣見派羅繞典馳赴襄陽一帶與荊州將

軍台湧會籌防勦必須鄰省聲勢聯絡方不至有疏虞著舒興阿
卽日帶兵迅速馳往陝西與湖北接壤處所察度形勢險隘擇要
嚴防務須隨時督飭地方文武員弁嚴密稽查勿使奸細闖入或
假作楚省難民與南山無業之徒潛相勾結所有一切調度並著
該督撫會商督辦一面飛咨新任陝西提督桂明接奉諭旨後迅
卽赴任仍須妥慎籌辦不可先事張皇致擾居民該督何時可以
馳抵陝省著先行奏報將此由五百里諭知舒興阿並諭張祥河
知之○署湖南巡撫張亮基奏岳州失守湖北提督博勒恭武等
先期潰散不爲湖南固守地方亦不爲湖北嚴防門戶得旨該提
督出境防堵汝等楚南官員必以爲多事是博勒恭武雖勝亦不
足爲功試思此何時何事存如此小見身膺疆寄者固當如是乎
○賞還欽差大臣兩江總督陸建瀛頭品頂帶○戊子諭內閣陸

應穀奏探聞湖北大兵追剿情形並出省調度一摺該匪自占踞漢陽之後竄至黃陂漢口地方經向榮督同張家祥帶兵追殺二千餘人並將浮橋燒斷逆匪竄至黃州復經官兵截剿殲斃甚多賊勢已挫第恐剿敗之後四散竄逸河南信陽等處先經署藩司鄭敦謹前往派兵嚴堵陸應穀見赴南陽一帶相機調度前調山東山西精兵並直隸大名鎮暨西安駐防勁旅均已先後抵豫在後官兵計已陸續趕到當此防剿喫緊之際豈容稍事遷延琦善接奉疊次諭旨必當兼程徑赴楚豫交界督同陳金綬籌辦防剿事宜毋庸先行到省致稽時日徐廣縉已將岳州土匪剿除自己督兵赴援著卽與向榮嚴飭各鎮將於大江南北分路兜剿黃州一帶毗連江西安徽等處陸建瀛此時當已馳抵九江上游著卽督同鎮將分扼水陸要隘毋任賊匪乘間紛竄徐廣縉陸建瀛琦

善仍當隨時互相知照總期勦力同心和衷共濟蠢茲醜類何難
一鼓蕩平該大臣等身受重恩自必妥籌制勝以副朕望也陸應
穀交卸巡撫印後仍著奏明聽候諭旨○己丑諭內閣據戶部遵
旨議覆崇文門徵收貨稅向以茶酒煙布爲大宗近來酒稅日見
虧短總因奸商雇覓貧民私運私背囤積隱賣漏稅日多則正稅
日少著步軍統領衙門順天府將販運私酒各匪犯隨時一體查
拏奏明懲辦至崇文門徵稅口岸向例在蘆溝橋東壩板橋海淀
設役巡查道光十三年並二十三年復於密雲縣之穆家峪石匣
順義縣之半壁店各地方添設稅局派員稽查既有例定口岸該
商等自不容繞道巧避差役人丁亦不得越境私拏致滋流弊著
崇文門監督遵照定例實力整頓隨時稽查毋庸輕議更張○諭
軍機大臣等有人奏豫省歸德府所屬毗連江蘇安徽山東地方

有捻匪陳四陳二耿金豹鄧七等結黨滋擾陳二一股被拏逃至山東曹縣單縣一帶該犯等與江蘇豐縣匪徒皇甫棠聯絡一氣皇甫棠夥黨甚多分布水陸各要隘屢經地方官查拏未能弋獲等語捻匪結夥肆行最爲地方之害見當楚匪未靖偏近豫省恐暗中勾引爲患更甚必應及早掩捕以免蔓延著陸建瀛楊文定蔣文慶琦善陸應穀李德各派明幹司道大員前往交界處所督同各該地方文武選帶兵役嚴密查拏務期不分畛域合力兜捕迅將首要各犯悉數擒獲此案逆惡匪徒法所難宥拏獲訊明後卽當按律正法俾匪徒知所儆畏若照尋常盜案審轉致稽時日轉恐有意外之虞至所稱耿金豹及夥黨數人先經虞城縣拏獲繫獄被陳二糾眾入縣索去又強借銀兩該縣畏其兇饒隱忍交給如果屬實地方官養癰貽患無怪匪黨橫行肆無忌憚著琦善

陸應穀查明嚴辦毋稍徇隱原摺鈔給閱看將此各諭令知之○

以 皇后兄候補筆帖式廣利承襲一等侯賞委散秩大臣○以

許乃釗爲內閣學士

由國子監祭酒遷

○戶部議准署浙江巡撫椿壽疏

報富陽象山樂清三縣閒墾沙地七頃五十二畝有奇照例升科

從之○庚寅徐廣縉奏

臣

行抵巴陵接據大營稟報逆匪自到武

昌分股四面滋擾自洪山至南門外之江岸紮營數十座福興玉

山蘇布通阿之兵先後到齊卽經向榮商令徑偪東門外之洪山

紮營連日從長虹橋板橋一路轉戰而進紮營於卓刀泉會勦於

十一月二十三日合力進攻湖南貴州廣東四川之兵最爲奮勇

首先擒至賊巢該逆分數隊出拒我兵奮勇攻撲斃賊不少餘仍

奔回巢內當經向榮嚴申軍令整頓隊伍會各鎮將分路進剿二

十八日湖南貴州廣東之兵直撲洪山當將賊巢攻奪所有賊營

一律燒燬我軍直追至城下賊匪逃向江岸因通漢陽之浮橋先被我軍拆斷賊無後路仍退回死拒各鎮將督飭兵勇上前不敢收隊等因臣查武昌城外之賊經此次痛剿自可解圍惟占踞漢陽及水陸之匪勢必聞風而竄臣惟有督飭向榮相機設法渡江並令蘇布通阿馳往漢陽上游遏其竄往荆襄之路 上諭內閣逆匪竄擾武昌經此次痛剿賊鋒已挫武昌自可解圍惟占踞漢陽及水路各匪勢必聞風紛竄徐廣縉見已趕赴武昌著與向榮督飭帶兵各員渡江奮力環攻上游荆襄下游黃蘄各處飛即分派精兵截擊並著羅繞典台湧於荆襄一帶遏賊西竄陸建瀛計已馳抵九江遏賊東路著與張芾蔣文慶嚴防江西安徽水陸要隘相機進攻陸應穀已抵南陽琦善不日亦可到豫北路大兵陸續雲集該大臣將軍督撫提鎮等務當不分畛域同心協力迅掃

賊氛毋稍延誤○諭軍機大臣等本日據徐廣縉馳奏追剿賊匪疊次大獲勝仗一摺逆匪自到武昌分股滋擾經向榮督同福興玉山蘇布通阿等合力進剿疊獲勝仗省城當可解圍惟南岸之賊仍係分股其大股俱在水路及江北漢陽漢口等處難保不聞風四竄且賊情詭譎異常更恐以南岸之賊牽制我師其大股復潛圖他竄如廣西湖南卽前車之鑒賊由水路則江西安徽江蘇等省陸路則河南之信陽南陽等處在在均關緊要至西北鄖襄一帶爲川陝門戶並須嚴防竄越徐廣縉計已馳抵武昌前奏擬派蘇布通阿馳往上游杜賊西竄之路此時是否已有布置著與向榮迅速籌辦萬不可令賊匪奪險紛竄羅繞典此時是否已抵襄陽台湧荊州兵單亦恐未能力遏賊鋒必須派得力將弁添兵防剿陝西交界處所已諭令舒興阿等派兵設防務須聲勢聯絡

不可稍分畛域武昌若已解圍向榮察看賊勢何處喫重卽督率鎮將相機攻剿總以繞出賊前截擊或伏兵要隘接應斷不可徒事尾追又致滋蔓至福建兵未能出力業經向榮懲辦軍營近來習氣必應嚴加整頓此後儻有畏葸不前者無論將弁兵丁卽以軍法從事斷勿姑容其出力將士立予獎勵俾人知懲勸則兵氣更揚至江面下游一帶陸建瀛計已統帶重兵泝流而上江西安徽水陸要隘防不勝防惟有擇險據守確探賊蹤督兵進剿並隨時知照張芾蔣文慶楊文定及江甯將軍祥厚一體嚴防見在漢陽尙有賊踞孝感黃陂一帶均有賊營去豫甚近情形更爲緊急若賊匪乘虛北竄而琦善尙未到境豈不坐失事機朕所以疊次嚴催琦善馳赴楚豫者正恐漢陽賊竄北路當衝著該大臣遵奉前諭與陳金綬統帶大兵星速趨行儻楚匪竄入豫境朕必治以

遷延之罪琦善未到以前陸應穀計已馳抵南陽所調直隸及山東山西陝西各勁旅計已先行趕到兵力不爲不厚卽著陸應穀妥爲布置堵剿兼施並隨時知照湖北軍營聯爲一氣毋得稍有推諉將此由六百里各諭令知之○戶部議准署雲南巡撫吳文鎔疏報安平同知所屬開墾民田三十四畝照例升科從之○王辰諭軍機大臣等張芾奏馳抵九江籌防情形一摺逆匪竄入湖北逼近江西見在大兵攻剿武昌當可解圍賊旣窮蹙勢必紛竄毗連各要隘急宜堵禦張芾見已馳抵九江並於道士袱安設營壘派委大員帶領兵勇前往駐紮惟九江存城及江蘇福建各兵不過二千兵力尙形單薄所有湖南歸伍之江西兵千名已有旨諭令徐廣縉張亮基飭令迅速折回江西並於大營酌撥弁兵星速赴九江合力截剿陸建瀛早經啟程此時計亦可抵九江著會

同張芾相機籌辦如向榮等攻勦得手尙須東路策應陸建瀛卽帶領兵勇泝流而上與武昌大兵合力夾擊或武昌圍解賊匪紛竄順流而下則迎頭截擊與向榮等派出之兵兩面兜勦更可得力惟水路固宜嚴防陸路亦必分兵守禦總期妥爲布置毋墮賊匪聲東擊西奸計其雇募糧船水手以壯聲威一節卽著該督撫等酌商辦理將此由六百里各諭令知之○諭本日張芾奏馳抵九江籌辦防堵一摺據稱湖南歸伍之江西兵一千名從前疊准該省督撫咨覆已飭啟程見據帶兵官李崇勳稟稱撫臣張亮基諭令暫緩節次咨催尙無覆信等語見在九江兵力單薄賊已竄離湖南所有應行撤回原省之江西兵著徐廣縉張亮基卽行飛飭啟程馳赴九江又福建兵三千名昨據徐廣縉奏勦賊不甚得力此項兵丁是否全數行抵大營應否飭赴九江協防之處著徐

廣縉向榮酌量辦理見在向榮等得獲勝仗盡將賊營燒毀武昌
自可解圍江中浮橋既被我兵燒斷當不患乏船濟渡徐廣縉計
已抵武昌省城卽與向榮督飭南岸大兵設法渡江將黃陂一帶
賊營痛加攻剿能將水面及漢口土城賊匪合力圍剿卽可乘勢
收復漢陽爲一鼓殲除之計惟賊情詭譎勢必又圖他竄不上窺
荆沔則下擾黃蘄徐廣縉向榮務須通籌豫防儻賊順流東竄江
省兵單甚爲可慮著卽由大營選派奇兵繞出下游與陸建瀛派
防之兵扼要合剿毋任竄逸其西北荆襄一帶亦必須派兵與台
湧羅繞與協同防堵仍隨時知照河南出兵夾擊該大臣等總當
合力同心互爲聲援以期無失事機切勿專顧本境致賊遠颺又
踰從前覆轍將此由六百里各諭令知之○以文清爲內閣學士
由大理寺卿遷○癸巳徐廣縉奏臣於十二月初九日行次岳州接據探

報連日向榮等由洪山一帶剿賊於省城之東疊獲勝仗西面平
湖文昌各門濱臨大江不意該逆潛施詭謀開挖地道竟於初四
日辰刻用地雷轟塌城垣守陣兵潰逆眾卽從缺口擁入省城登
時失守文武各官不知下落請旨飭下各路統兵大臣速撥勁旅
會合進剿迅圖克復臣救援不力應請將臣從重治罪 上諭內
閣本日據徐廣縉馳奏逆匪攻陷武昌省城失守一摺覽奏憤恨
莫可言喻該大臣前次奏報尙云武昌自可解圍乃數日之間遽
報失陷豈軍情緩急但憑稟報如在夢中耶徐廣縉自長沙前赴
湖北本已遷延向榮爲軍營統領雖經趕到獲勝乃不能乘勢擇
要攻剿遲延數日致誤事機均屬罪無可追見值剿辦喫緊之際
若卽重治其罪轉得置身事外徐廣縉著革去兩廣總督拔去雙
眼花翎仍以欽差大臣暫署湖廣總督向榮著革職仍幫辦軍務

戴罪剿賊以觀後效武昌爲省會要地乃竟被賊攻陷官兵士民慘遭荼毒朕自愧自恨用人失當不能迅速拯我生民殄茲羣醜顧瞻南服寢饋難安前已令琦善陸建瀛爲欽差大臣各帶大兵馳往迎剿又命陝甘總督舒興阿四川將軍署總督裕瑞各選精兵馳往楚省交界合力剿捕其各勦力同心以靜疆圉毋得各存畛域觀望遷延致干重罪武昌城內文武各員著徐廣縉查明具奏○諭軍機大臣等本日據徐廣縉奏逆匪攻撲武昌省城失守覽奏焦急之至已明降諭旨將該大臣等革職戴罪自效矣徐廣縉督兵遲緩致誤事機向榮雖於城東疊獲勝仗未能保護省城均屬罪無可逭見當賊勢猖獗剿辦喫緊之際是以姑從寬典徐廣縉著卽兼程前赴武昌會合向榮妥籌兜剿一面知照羅繞典台湧嚴防上游一面飛咨陸建瀛張芾等各派精兵泝流而上一

律截擊毋得再有遲延湖北省城文武下落並著迅速查明具奏至武昌省中截留軍餉三十餘萬盡爲賊得軍營支應如何接濟此時撥餉在途者尙有若干著徐廣縉飛催前途繞道解運並須加倍慎重本日已寄諭葉名琛令其設法籌畫由江西湖南解運軍營以濟急需矣將此由六百里加緊諭令知之○諭前諭令舒興阿馳赴陝楚毗連處所擇要設防復諭令舒倫保張祥河於舒興阿未到之前派委文武大員迅往交界嚴密防守本日據徐廣縉馳奏本月初四日武昌失守逆匪勢益猖獗陝西路通湖北鄖陽等處防守緊要著舒興阿卽遵前旨迅督精兵兼程前進其未到陝以前仍著舒倫保張祥河飭令所派各員妥速設防毋稍延誤將此由六百里各諭令知之○諭前諭令琦善馳赴楚豫交界地方與陳金綬統帶大兵迅速進剿並令陸應穀馳赴南陽安爲

布置該大臣等諒已兼程前進設法安籌矣見在武昌失守楚豫毗連處所防剿十分喫緊琦善陳金綬著卽督兵前進與徐廣縉陸建瀛向榮等各路精兵四面兜圍相機進剿斷不可各分畛域致誤事機將此由六百里加緊各諭令知之○諭本日據徐廣縉奏武昌省城被賊攻陷一摺覽奏焦急之至陸建瀛前奏先回省城料理卽赴九江防剿惟見在賊勢益張剿辦萬分喫緊著該大臣迅速兼程馳赴九江會同張芾選派得力將弁一面扼要嚴防一面泝流直上會合楚省官兵前後夾擊毋稍遲誤至安徽水陸各路與湖北多有毗連若賊匪乘勢東竄在在堪虞著陸建瀛蔣文慶將見在調到各兵遴選得力員弁管帶分守要隘一律堵截毋得稍有疏虞將此由六百里加緊諭令知之○諭武昌省城被賊攻陷所有截留餉銀三十餘萬兩諒必盡爲賊得湖北大兵雲

集待餉孔殷各省解撥餉銀亦恐不免阻隔著葉名琛迅速設法籌畫無論廣東何款但可移緩救急著卽奏明起解就近由江西湖南等處妥速遞往大營以濟要需並知會沿途各督撫多派幹員小心防護毋得稍有疏失將此由六百里加緊諭令知之○諭見在賊勢猖獗四川與湖北毗連亟應調兵策應裕瑞見署總督未便遠離省城著卽選派得力鎮將酌帶精兵順流直抵湖北交界與徐廣縉等會同剿辦毋稍延誤所需經費並著該督設法籌辦以濟急需將此由六百里諭令知之○命直隸提督陳金綬幫辦軍務○甲午諭內閣德勒克多爾濟等奏請捐餉軍需一摺訥勒亨額倡捐銀一千兩著卽賞收交部從優議敘其部屬章京主事筆帖式蒙古等官會同捐輸具見誠悃惟該員等所得俸銀藉以當差所捐銀兩著毋庸賞收以示朕體恤之至意○以駱秉章

暫署湖北巡撫向榮暫署湖北提督○乙未諭內閣李德奏帶兵武弁縱兵滋擾逗遛等語前因兵差騷擾特降旨令統兵大員嚴飭將弁約束兵丁儻於經過地方例外需索卽照軍律嚴行懲辦茲據奏稱濟南城守營千總李昌脈經制外委唐振興帶兵行抵滕縣輒因索費不遂縱兵鼓譟毆打辦差家丁逗遛不進實屬目無法紀若不嚴加懲治何以肅軍令而挽惡習李昌脈唐振興業已行抵安徽著蔣文慶卽將該弁扣留委員押解山東交李德嚴訊沿途詐索情形按律從重治罪以昭炯戒○諭理藩院奏內外扎薩克汗王貝勒貝子公額駙台吉塔布囊等因軍務未竣情願將一年俸銀捐備軍需呈請代奏等語蒙古諸王公等來京值此軍需孔亟情願將伊等所得一年俸銀呈請捐輸忠悃出於至誠朕甚嘉悅惟該汗王等所得俸銀旣係藉以當差其所捐銀兩著

毋庸賞收汗車林多爾濟親王巴圖色登端嚙布索特納木彭蘇
克納木濟勒車林多爾濟貢桑珠爾默特郡王索特納木倫布木
林沁扎勒贊濟克默特朗布色伯克多爾濟那木濟勒旺楚克布
彥德格呼固魯克齊阿爾塔什第吹精扎布貝勒喇木棍布扎布
貢葛喇布坦那遜鄂勒哲依布彥巴達爾呼賽音濟爾噶勒貝子
阿米果爾圖達克沁桑齊薩喇特多布公烏勒金濟爾噶勒阿喇
坦鄂齊爾帕勒布德哩克呢木克什克阿爾畢濟呼桑噶扎布等
俱著各賞給大卷袍料一件台吉阿勒坦鄂齊爾濟嗎喇濟哩第
德木楚克蘇爾隆托第布木布達莽噶拉額駙多布沁喇布濟烏
勒濟布彥貢布色楞卓特巴扎布塔布囊德勒格爾布彥圖三音
錫哩多爾濟喇布坦三等子爵察克都爾扎布等俱各賞給小卷
袍料一件八絲段袷料一件由廣儲司撥給以示體恤蒙古世僕

之至意○諭理藩院奏喀爾喀扎薩克郡王托克托瑚圖嚕率伊弟等呈請捐貲助餉以備軍需祈爲代奏等語喀爾喀扎薩克郡王率伊弟扎勒幹扎布伊子莽珠巴咱爾賽蘇察爾拉圖等具呈情願捐備軍需銀二千七百兩具見忠悃實出至誠惟念軍營應需銀兩見已備辦足敷支用其所捐銀兩著毋庸賞收加恩該喀爾喀扎薩克郡王托克托瑚圖嚕著賞給大卷袍料一件大卷袼料一件由廣儲司撥給以示體恤蒙古世僕之至意○丙申諭軍機大臣等青磨楊以增奏辦理壩工一摺豐工緊要日盼合龍自本月初二日奏報進占後迄今又逾半月據稱初三後風雪交作瀟凌凝凍未能冒險進占幸驟轉東風俟積凌瀟盡相機進占放河等語大工垂成不可不認真趕辦但人力可施卽須督令進占未可以天寒藉口致誤事機該河督卽督同在工各員趁金門收

窄之時迅速設法進占總期年內及早合龍以副朕望楊以增查
文經及在事員弁經朕棄瑕錄用應如何感激思奮急圖自效儻
再有疏失其能當此重罪耶青磨著仍遵前旨駐工督催無任延
誤將此由四百里諭知青磨楊以增並傳諭查文經知之○諭據
陸應穀琦善先後奏探報逆賊攻陷武昌將兵民一律殺害銀米
掠擄上船文武各官均已殉難又據張芾奏向榮退駐青山賊船
數百已至黃州掠糧各等語覽奏憤恨莫可名言徐廣縉兼轄兩
省不能迅速督兵前進力解武昌之圍以致省城失陷若再令東
竄江西北竄河南自問當得何罪武昌失守後賊匪是否占踞分
股他竄抑已大隊出城另圖滋擾向榮不能力救危城乃退守青
山見擬作何進止昨有旨令向榮署理湖北提督仍幫辦軍務責
無旁貸據張芾奏探武漢下游如黃州大冶等處並無一兵堵截

該大臣與向榮豈任聽逆匪東竄束手無策邪見在九江告急陸建瀛泝流而上兵力單弱朕心甚爲焦念向榮與蘇布通阿福興玉山和春秦定三鄧紹良瞿騰龍等所帶兵勇不下數萬豈有坐視該逆橫行不謀截擊之理著向榮卽速選派得力鎮將大員先行統帶精兵數千名無論水陸各路設法繞至九江上游與張芾會同截擊遏賊東竄陸建瀛計已馳抵九江兩省共辦一事斷不許稍分畛域之見向榮仍察看賊勢何處緊急卽帶兵前往攻剿毋失事機省城被陷文武官員如何殉節情形著該大臣等迅速查明具奏並分派官兵撥往北路與河南大兵會合籌剿令逆匪不得北竄該逆自粵而楚所至蹂躪不堪儻蔓延他省則九江以下無險可守東南數省騷應山以北稍有疏虞河洛亦爲之震恐該大臣等撫心自問應如何爲朕分憂邪將此由六百里諭知

徐廣縉向榮並傳諭軍營提鎮將弁等知之○諭陸建瀛奏遵旨籌辦並催調官兵啟程出省各摺片又張芾奏九江待兵孔急一摺見在賊船數百已至黃州劫糧所調官兵至九江者僅止百餘卽下巢湖武穴鎮老鼠峽等處江而屯兵均僅二三百名賊氛偏近守禦實嫌單薄該大臣旣於本月十五日自江甯啟程著迅速兼程前進所調官兵船隻卽派游擊楊冠春尉鼐統帶與方翔徑抵九江上游迎頭堵截所請飭調直隸山東兵三千名無論該二省調防兵數已經不少卽使再加調遣亦恐緩不濟急茲已諭知徐廣縉向榮派得力鎮將統帶重兵繞至九江截擊並令向榮察看賊勢何處喫緊卽行親赴應援矣其前經調赴江西未至之兵著陸建瀛嚴札飛催陸建瀛未到以前著張芾設法妥籌防守如可力爭上游扼要進攻卽著相機辦理琦善卽日可抵楚豫交界

本日已飭令統帶生力勁兵疾趨湖北遏賊東竄並飭徐廣綰會合剿辦其安徽省沿江一帶布置機宜陸建瀛與蔣文慶務須悉心籌畫督飭張熙宇等嚴密防守有應行隨時酌商調派之處該大臣與該撫飛咨商榷毋須在皖耽延總以疾抵九江鎮定人心隨機進剿爲要至江甯一帶各江防均如所請辦理著楊文定與將軍祥厚督同藩司祁宿藻並前廣西巡撫鄒鳴鶴將團練保衛事宜與江岸水路各要隘妥爲籌備江蘇安徽兩省均著密飭文武地方員弁分投巡查一有奸細闖入拏獲卽行正法江西安徽陸路與湖北毗連處所一律嚴防該大臣馳赴蘄黃一帶與徐廣綰琦善會剿情形隨時奏報以慰廑念將此由六百里各諭令知之○丁酉諭內閣前有旨令駱秉章署理湖北巡撫著於荊州襄陽二府內酌量何處緊要暫行駐紮辦理地方事宜○諭據御前

行走哲里布盟長親王巴圖昭烏達盟長郡王那木濟勒旺楚克
卓索圖盟長郡王色伯克多爾濟等呈稱伊等見因年班來京聞
湖北逆匪攻撲城池凡屬蒙古世僕同深憤恨願各揀精兵自備
資斧前往報效由軍機大臣代奏該盟長等世受國恩情殷圖報
具見誠惻惟見在軍營撥調各省精兵足資剿辦所有呈請備兵
赴剿之處著暫行毋庸前往仍聽候諭旨調遣該盟長等志切同
仇深堪嘉尚著俟軍務告竣時再予恩施○命內閣學士許乃釗
赴兩江總督陸建瀛軍營聽候差委前山東按察使徐思莊交署
江西巡撫張芾差委○戊戌諭軍機大臣等昨據江西探報賊船
數百已至黃州掠糧九江勢甚急迫又據陸應穀奏附近河南之
信陽州應山黃陂等處俱有賊匪等語河南安徽江蘇皆與山東
毗連亦應早爲防範著李德偵探賊蹤遠近察看地方情形於交

界扼要處所帶兵前往駐紮調度以資防守將此諭令知之○諭
裕瑞奏乍丫夷務情形並廓爾喀貢使啟程來省一摺據稱乍丫
大小喇嘛經委員朱長春多方開導業已照常供差並將首犯彭
錯等拏獲其諾們罕已遷移王卡寺中聽候寶清順道查辦所有
應用賞需茶葉亦經委員帶往自不難剋期了結惟該處僧俗刁
悍性成仍須隨時相機妥辦海枚諄齡到任尙需時日仍著穆騰
額察看情形如該喇嘛桀驁不馴卽遵前旨懾以兵威所需口糧
就近在藏餉項下先行動支以歸簡便廓爾喀貢使到省著裕瑞
派員妥爲護送毋令耽延將此諭令知之○署江西巡撫張芾奏
武昌失守九江緊急情形得旨覽奏賊船已近道士洑江西省十
分喫緊見雖飭向榮等分兵截剿止恐斷難趕上汝在九江惟有
竭力防堵朕日夜悔恨無及若江省再遭蹂躪朕咎更深矣○己

亥諭內閣前據奕興奏奉天災歉地方旗丁出外謀生請變通章程辦理一招當交戶部速議具奏茲據奏稱該旗丁實因本年金州復州田禾災歉貧苦無資暫駐雙城堡就食與平日無故前往希圖占居者情事不同等語朕思該處旗丁偶遭荒歉若將其外出謀生之路概行禁止非所以示體恤著照該將軍等所請將原定續往雙城堡旗人照逃旗辦理章程暫予寬免仍著該將軍等轉飭該營各員挨戶查明冊報俾有稽考並著吉林將軍妥爲勸諭俟年歲豐收各歸本旗以安生業儻查有流民潛往影射卽著飭屬認真驅逐毋任別滋事端○諭軍機大臣等前據徐廣縉奏報武昌失守情形未能詳悉數日又無續報本日陸應穀奏據李殿華等稟報武昌城內兵民數萬人盡遭賊匪慘害朕覽奏悲憫之餘尤深憤懣該大臣屢次遷延坐視貽誤是何肺腑向榮等雖

於城外攻勦亦未能力解省圍致數萬生靈罹此慘毒若再不圖
補救自問於心何安見在荊州盤獲奸細有窺伺荆襄之信而下
游黃州一帶有賊船游奕距道士洑甚近賊情詭詐異常聲東擊
西是其故智陸建瀛泝流而上九江等處兵力太單朕心甚爲廕
念昨已有旨諭令該大臣等選派得力鎮將繞赴江西湖北交界
遏其東竄此舉萬不可稍緩再有貽誤並著向榮確切偵探何處
緊急卽提兵親往救援並隨時知照陸建瀛張芾等不分畛域合
力兜勦若荆襄一帶喫重亦卽先其所急不可顧此失彼賊情詭
詐慣爲牽綴之計向榮諒已深悉有人奏守城宜限以日期並兵
將趕緊赴援各專責成等語著鈔給閱看如可試行卽通飭遵辦
漢陽武昌殉難文武官員卽速查明具奏將此由六百里各諭令
知之○諭據台湧等奏拏獲奸細有賊匪約於正月初間竄擾荆

州之說該城守兵僅三千餘名不敷防勦武漢池西無官兵駐守堵截等語著琦善陸應穀迅將已到南陽之西安駐防兵一千名卽飭統領官員星夜管帶馳赴荊州交台湧派撥守禦見計該大臣早已行抵信陽所有豫境防勦事宜卽與該撫陸應穀將調到各兵嚴密布置陳金綬帶兵應於何路進攻斷不可以有用之兵置之無用之地自南陽至信陽一路凡有鄰楚州縣水陸要隘如何設防務須聲勢聯絡相機進勦爲楚北援應昨張芾奏賊船已近道士洑九江情形緊急陸建瀛所帶兵力亦甚單弱必須該大臣等選派精兵馳往會剿或帶兵繞出安徽迎頭截擊不可專顧一面致誤事機在守土官員固當早謀捍禦而援兵觀望不前以致力竭失守罪亦難寬該大臣等卽傳諭軍營將弁儻有派令援應觀望不前者卽行嚴辦至賊匪分布奸細窺探軍情據荊州獲

犯供有數十人恐各路四散者甚多並著嚴飭文武隨時密拏勿墮奸計所有郡縣城濠應行及早修濬之處卽行妥籌辦理將此由六百里各諭令知之○論昨據張芾奏賊船數百已至黃州掠糧是該匪已有東下之勢江甯省城尤爲緊要見在陸建瀛馳赴督剿楊文定行抵省垣著會同該將軍副都統督同藩司祁宿藻等妥速籌商遴派得力將弁於江岸上游扼要防守遏賊東下之路提督福珠洪阿著卽帶兵馳赴江甯於城外要隘密爲布置以衛省垣至京口爲江蘇省城門戶並著會同該副都統加意防範毋稍疏忽該匪攻城慣用地雷果能嚴密巡查並於城外挖濠何至墮其奸計見在鄒鳴鶴計已到省其在桂林守城尙有微勞賊情諒所深悉著卽幫同籌辦江甯城大兵單守禦必應嚴密福珠洪阿到省後務當擇要布置以期水陸兜剿不可稍有疏虞將此

由六百里加緊諭知祥厚楊文定霍隆武文藝福珠洪阿並傳諭
祁宿藻知之○署河南巡撫陸應穀奏據湖北孝感縣知縣李殿
華探稟武昌失守情形鈔錄呈覽得旨據李殿華等詳稟情形閩
城文武兵丁及百姓不下數萬遭此慘毒朕垂淚覽之尤自恨無
德無才不能感格 上蒼也○賞欽差大臣琦善都統銜專辦軍
務毋庸署河南巡撫○實授葉名琛兩廣總督柏貴廣東巡撫陸
應穀河南巡撫張芾江西巡撫○調山東綠營兵一千名赴荊州
防剿青州駐防兵一千名赴琦善軍營○庚子徐廣縉奏湖北武
漢兩處見在均爲賊踞上下游人情震動先宜安鎮軍心再籌進
止大兵仍紮洪山一帶未經移動武昌城內如何情形無從探悉
惟有撫臣常大瀄親隨壯丁二人縋城逃出路過岳州據稱十二
月初四日辰刻忽報文昌門被賊攻破該撫臣聞警遂帶壯丁上

城督守誓死不退當被賊匪戕害壯丁亦被害多人其餘文武員弁分守各城如何下落伊等不知等因查撫臣常大滄臨難捐軀應請旨交部議卹其餘文武各員容查明奏辦武昌省會既陷湖北全省應辦事件臣暫爲經理此時大營兵勇已由向榮統帶全赴武昌而岳州爲南北兩省咽喉地居扼要卽大營糧臺亦須經由岳城庶便往前轉運臣見擬暫住岳州擇要設防以爲我軍後路聲援並可遏該逆回竄上諭內閣調任山西巡撫湖北巡撫常大滄秉性忠貞官聲素著前因粵匪竄擾湖南卽奏請嚴守岳州並力籌武昌防守事宜不料岳州文武棄城失守遂令逆賊長驅直入徑抵武昌該撫督率文武官吏嬰城固守二十餘日竟被地雷轟發省城失陷該撫猶親督守兵登陴力戰誓死不退爲賊戕害孤忠亮節可憫可嘉常大滄加恩著晉贈總督銜入祀昭忠

祠卽照總督陣亡例賜卹任內一切處分悉予開復應得卹典該衙門察例具奏尋予祭葬世職諡文節○諭軍機大臣等徐廣縉奏查明湖北署撫臣殉難情形一摺已明降諭旨將常大滄賜卹矣岳州爲水陸扼要之區大營糧臺由此轉運自應擇要設防以爲後路聲援向榮見紮營洪山一帶與岳州大營聲勢自必聯絡惟賊匪占踞武漢之間遊船已抵道士洑其爲意圖東竄而以別股牽制我軍情形顯然見在北路尙有重兵而東路陸建瀛等兵力甚單專望向榮飛派將弁帶兵繞出黃州下游協同截剿遏賊竄路向榮與蘇布通阿等尙知兵機豈竟坐擁重兵爲該大臣前途保衛任聽下游失事耶軍營向來習氣推諉遷延固屬可恨而統兵大員用心亦復如是前者桂林圍解畱兵自衛輒以恐賊回竄爲詞不旋踵而全州失守擾及楚南今長沙圍解賊入岳州棄

而不守旋復攻陷漢陽武昌而該大臣逗遛巴陵又以恐賊南竄
爲詞試思賊匪徧滿武漢之間擄船千計其意非欲順流東下而
何江皖兵單力弱又係財賦之區賊若水陸齊下大局將不可問
該大臣統領數萬重兵卽武漢尙未收復不能全軍東援亦必須
分撥精兵保護下游與陸建瀛會合截擊方爲統籌全局若以岳
郡爲藏身之固以全師爲自衛之謀甘心失機又蹈重罪亦何面
目對殉難官兵及數萬生靈邪前有旨令駱秉章署理湖北巡撫
並令於荆襄兩郡擇要駐紮崇綸未到以前所有湖北省一切事
宜卽著會同徐廣縉籌辦另片奏江蘇福建等省餉項仍應取道
江西解赴長沙由原辦糧臺轉運其川省解到餉銀就近解往荆
州分投糧臺支應等語業經交部查照辦理矣將此由六百里各
諭令知之○諭朕聞江中小孤山爲蘇皖鎖鑰有險可守前據蔣

文慶奏飭令臬司張熙宇等帶領兵勇前往扼要布置自可遏賊東竄之路前任漕運總督周天爵僑居皖省已有旨令其協同蔣文慶辦理團練防剿事宜或卽在小孤山協防或另擇要隘處所堵禦截擊所帶練勇卽歸周天爵管束以期調度得力又聞安徽定遠縣知縣金光飭善緝土匪揚州候選教職張積中爲士民所推重著陸建瀛等嚴加訪察如堪委任卽酌量差遣將此由六百里各諭令知之○調李嘉端爲刑部左侍郎以許乃普爲兵部右侍郎由內閣學士遷○命前任漕運總督周天爵協辦安徽團練防剿事宜○賞太常寺卿廖鴻荃以尙書銜致仕○辛丑諭內閣前因廣西逆匪竄擾湖南賽尙阿師久無功特命徐廣縉爲欽差大臣就近督辦乃由梧州抵衡州軍營業已遷延多日長沙被圍兩月有餘若非向榮及地方文武竭力守禦幾致失事及解圍後徐廣縉

始抵長沙省城而逆匪已乘虛復陷岳州長驅北竄直抵武昌徐廣緝調度失機罪已難追朕猶冀其戴罪圖功僅予薄懲疊經嚴諭令其督兵兼程赴援乃藉詞土匪牽制耽延不進至今株守岳州一籌莫展惟向榮及諸將先後趕到武昌與賊接仗雖屢次獲勝而主將遠隔數百里外兵機緊急何所稟承漢陽旣已失守武昌省垣又復淪陷文武官員兵丁人民數萬生靈慘遭荼毒朕引咎自責寢饋難安乃昨據徐廣緝奏報仍以防賊回竄爲詞竟擬駐紮岳州所有江面上下游及漢陽北路一帶全未籌及是直以岳郡爲藏身之固擁重兵爲自衛之謀甘心失機大負委任已革兩廣總督署湖廣總督徐廣緝著革去署任卽行拏問由張亮基派員解交刑部治罪向榮自抵軍營兩載有餘雖亦不免挫失而桂林長沙兩處守城均能迅速赴援追賊湖北亦係該員首先趕

到朕用人略短取長毫無成見但能勇於任事即可承受朕恩向榮著卽授爲欽差大臣接受關防賞還提督頂帶專辦軍務所有軍營文武統歸節制有能奮勇立功者據實保奏其不遵調度臨陣退縮巧避者卽按律嚴辦值此剿賊喫緊之際陸建瀛琦善向榮雖分省統兵實則共辦一事若彼此推諉稍分畛域不肯合力夾擊以致鄰境被擾滋蔓難圖朕亦惟有執法從事決不姑寬懍之勉之○諭國家養贍兵丁原爲遇有軍旅之事共相奮勉以期蕩賊氛而保良善今逆匪騷擾廣西湖南等省特調吉林黑龍江兵四千名皆精銳之兵槍箭最爲純熟必當剋日掃除迅奏膚功第該兵等由直隸河南地方經過其中偶有無知之徒因車輛飲食向驛站妄加需索沿途任意折挫民間則所謂保民者實反害民也儻有此等不知體統妄生事端者著該副都統等立即拏交

地方官嚴行拘禁據實參奏朕必將犯法之人照軍法辦理決不寬貸儻該副都統等因循袒護不行奏聞經該督等參奏不惟將犯法之人從重治罪必將該副都統等一併嚴行置議著此次派出監放官兵口分獎賞之王大臣等於吉林黑龍江官兵到日將此旨明白曉諭其各遵行○諭軍機大臣等本日已明降諭旨授向榮爲欽差大臣專辦軍務將徐廣綰革去署任卽行拏問矣逆匪占踞武昌窺伺九江賊船數百隻逼近黃州下游九江等處情形十分緊急該大臣既膺重任責無旁貸著卽遵前旨迅速派選鎮將撥兵數千前赴九江一帶遏賊紛竄仍隨時知照陸建瀛張芾合力兜剿無論水陸兩路萬不可任賊東竄其武昌漢陽之賊並著相機進剿以圖克復荆襄一帶及江北與河南交界處所隨時知照琦善陸應穀派兵接應本日已諭令琦善選派精兵交陳

金綬由河南陸路馳赴安徽一帶繞出賊前合力截剿矣該大臣統領重兵務當申明紀律嚴加整頓力洗從前遷延疲玩惡習公明二字時刻畱心軍中奮力將弁如鄧紹良等尙不乏人提鎮大員均朕特簡豈無天良但須調度有方甘苦與共自能同心協力迅奏膚功也將此由六百里加緊諭知向榮並著將此旨傳諭軍中帶兵各大員知之○諭據蔣文慶馳奏軍情緊迫請飭分兵堵剿一摺本日已授向榮爲欽差大臣令其揀派鎮將馳往九江一帶扼要兜剿又令陳金綬卽由河南馳往安徽一帶幫同截拏該督撫等卽將本省並已到各省官兵妥爲布置防剿兼施斷不可坐待援兵以致誤事將此由六百里加緊諭令知之○諭本日據蔣文慶馳奏軍情緊迫奉調之兵止到浙江兵一千名山東頭二三起官兵甫抵皖境等語安徽陸路毗連湖北防堵情形亟爲喫

重見在陸建瀛所帶之兵不及五千仍須南北鄰省官兵協力堵截方不至有疏虞琦善計已早到信陽著將見到直隸官兵內擇精銳數千名交陳金綬管帶星速馳往安徽一帶繞出賊前幫同截剿南北兩路應援庶免賊匪竄越若但自固藩籬遷延觀望坐視鄰境失事朕惟統兵大臣是問信陽南陽各處著琦善與陸應穀派兵嚴行防範琦善仍當遵奉前旨相機越境督兵進剿與向榮聲勢聯絡勿任賊匪從容布置再有滋蔓又前任遊擊牛鳳山係河南人著交琦善陸應穀差遣委用將此由六百里加緊各諭令知之○諭本日已明降諭旨授向榮爲欽差大臣又命張亮基署湖廣總督潘鐸署湖南巡撫矣該署督接奉諭旨卽行馳赴岳州督辦防剿事宜務與大營聲勢聯絡所有湖南省城地方事宜責成潘鐸辦理駱秉章前已諭令署理湖北巡撫並令於荆襄兩

郡酌量駐紮著張亮基會同商定司道以下各員應於何處分駐印信遺失者奏明頒發程喬采督辦糧臺亦應移至岳州一帶糧臺分設應在何處著張亮基等一併會籌妥辦毋得稍有貽誤將此由六百里加緊各諭令知之○以張亮基署湖廣總督潘鐸署湖南巡撫岳興阿爲湖南布政使陶恩培爲湖南按察使由衡州府知府

○調張集馨爲湖北按察使周啟運爲河南按察使以穆清阿爲直隸按察使由永定河道遷

○以易棠爲山西巡撫未到任前以工部左侍郎哈芬署理賞段大章三品頂帶爲甘肅布政使由陝西延榆綏道遷

○壬寅諭內閣明年二月二十六日 孝和睿皇后永遠奉安

山陵業經降旨定於二十日啟鑾奉安禮成後恭詣 慕陵行敷土禮事關國家大典豈可稍從簡略惟見在勦辦楚匪臣隸調兵數千又調吉林黑龍江官兵春間陸續過境兵差絡繹畿輔地方

支應實繁民力已恐竭蹶若再以蹕路經行致煩供億朕心實有
不安仰惟我 皇考宣宗成皇帝臨御三十年惻隱在抱無日不
以愛民爲心卽謁 陵典禮亦有從權停止之時矧茲逆氛未靖
民困未蘇朕承 皇考付託之重惟思憂樂同民因時布惠豈忍
拘循常典重累閭閻所有明年 孝和睿皇后梓宮奉安大典並
恭謁 慕陵行數土禮屆期應遣近支王代朕行禮俟民力稍紓
再行躬詣 山陵虔申誠悃至恭奉 神牌黃輿回京一切事宜
著各該衙門及直隸總督敬謹豫備經過州縣應行蠲免錢糧仍
當降旨照舊加恩此朕仰承 先志軫恤民依萬不得已之苦衷
我 皇祖妣暨我 皇考在天之靈定邀默鑒也該部卽刊刻謄
黃宣示中外俾咸知朕意○諭前因給事中金肇洛奏古北口官
兵行至良鄉有摔碎食器燒毀桌凳等情當交訥爾經額查奏茲

據奏稱古北口官兵過良鄉境均極安靜止有十二月初六日山
永協兵丁侯永魁王士謹在良鄉飯鋪內烤火順拾殘廢板凳欲
擲火中經書役攔阻稟明帶兵把總等約束卽行中止等語此奏
朕斷斷不以爲實旣稱攔阻中止是該兵丁等並無不合何以又
請將把總王運隆等議處兵丁咨革顯有不實不盡卽如山東調
赴安徽河南官兵在滕縣滋事李德卽據實參奏並不以本省爲
嫌訥爾經額久任封圻何竟沾染習氣飾詞入奏近來官兵過境
於例得支應之外往往任意訛索地方官欲行稟揭恐上司以辦
理不善斥其多事卽派員往查亦率迎合上司扶同隱飾以致官
兵過境益無忌憚不可不嚴加懲創以肅戎行著訥爾經額再行
詳悉確查據實具奏另降諭旨朕又聞宣化鎮官兵行至涿州亦
有擾累之事著該督一併查明具奏毋稍含混○癸卯諭內閣前

據王大臣會同戶部議籌軍餉內有房田補稅一條已令各督撫體察地方情形妥籌具奏茲據刑部侍郎李嘉端奏勒限稅契易致擾民請仍照舊章一摺所奏不爲無見此後各省房田稅契仍照定例辦理毋庸另議更張以杜流弊○署湖北提督向榮奏臣先後與賊鏖戰二百餘仗斬殺何止數千人該逆人數雖眾我兵誠能踊躍用命該匪早已殲除淨盡無如軍營積習疲玩顛預而壯勇一項不但追賊遲慢所過鄉邨恣意擄掠且有與賊勾通情弊至地方文武均有守土之責如岳州城堅地險有兵數千尙不能爲一日之守其益陽臨湘咸甯並見在之黃州府武昌縣各文武均不能嬰城固守一聞賊至卽棄城先遁以致百姓紛紛迎賊入城實深憤恨臣於十一月二十八日攻破洪山賊營立望武昌城圍可解乃十二月初四日賊用地雷轟塌文昌門城垣致被擁

入其時城上有兵六千人何以疏懈若此該逆既陷武昌於漢陽漢口搭有浮橋以通往來並據報該逆三千餘人乘船三四百隻赴下游運糧於十一日到黃州府及武昌縣滋擾該二處本無官兵防守地方文武早經遷避逆匪擄得銀錢穀米用船百餘隻於十三十四等日運回省城黃州有賊二千餘人武昌縣有賊千餘人分踞十二月十八日臣傳令各營齊出隊伍攻撲陰鷺閣賊營我兵呐喊擁入匪眾紛紛潰退遂攻賊於新南門查該匪船隻極多往來自如大營兵勇既有長江重湖之阻又無船隻可渡籌思至再此刻剿除之法先將賊船賊橋焚燬斷其往來之路然後設法克復方可得手聞九江調有官兵及江浙水師戰船堵截陸建瀛張芾均奉旨飭帶官兵赴上游會剿因查下游道士洑一處河面窄狹山勢險峻足爲長江關鍵兇已飛咨督臣陸建瀛及撫臣

張芾卽將水師戰船迅速溯流直上扼要灣泊一面於兩岸設兵四五千名犄角紮營深溝高壘水面戰守互相應援應請旨飭下陸建瀛張芾催令兵丁戰船星夜馳赴道士袱一帶扼險堵守廣東水師戰船會商請徐廣縉酌量調撥由海道駛入鎮江前刑部郎中盧應翔所帶礮船曾在長沙見家河擊賊尙屬可用已由徐廣縉飭調前來又總兵音德布管帶貴州陝西官兵千餘名遊擊韓世禧管帶湖南官兵數百名已請徐廣縉飛調音德布韓世禧於常德長沙多雇船隻配齊大礮順流而下並令韓世禧於長沙防城楚兵內再挑數百名湊成千名其副將鄧紹良帶有兵勇千餘名卽於岳州一帶多覓船隻並於洞庭湖招募水摸二三百名豫備柴草硝磺引火之物均令乘船駛至金口會齊約期一鼓而下焚賊船橋當較得勢此間尙有前在長沙見家河駕船擊賊之

捷勇甚爲得力廣東兵勇內尙可挑出水戰然礮之人均商由徐廣縉迅速辦理俾資攻擊 上諭軍機大臣等該逆攻陷武昌後於漢陽漢口搭有浮橋將城內銀錢搬入船內並有賊船三四百隻滋擾黃州府及武昌縣見在向榮擬設法將賊船橋焚毀斷其往來自應如此辦理所奏調集礮船招募水摸豫備火攻之具已諭令知張亮基潘鐸迅速妥籌照辦矣至所探黃州武昌兩城不能固守距營一二百里並無官兵防堵似此情形則九江最爲急迫前已疊次諭令陸建瀛迅帶水陸官兵前往迎擊並令張芾等嚴密布置惟陸建瀛並未徵調他省勁旅所帶兵勇不及五千人九江上游一帶兵力單弱朕心深爲懸念必須豫楚兩路大兵迅往應援堵截方能嚴密三路始可會剿朕所以屢諭琦善向榮等令其各選精兵馳往九江及安徽一帶與陸建瀛會合堵截正是

此意若南北兩路各固藩籬不能迅速應援則賊匪窺伺東路兵單勢必水陸下竄兩江當衝設有疏失亦必掣動全局向榮旣膺茲重任必當通籌合計一面攻剿武漢賊匪一面卽派提鎮大員統兵急趨繞出黃州之前或道士洑尙可扼守卽於彼處堵賊東下計湖南鎮將派撥船礮帶兵北來亦可剋期而至前後夾擊定能得手琦善與向榮共辦一事若逆匪竄至豫省向榮之有意欲清本境琦善之諉過於人斷難逃朕鑒也琦善已抵信陽卽統兵馳赴湖北並著陳金綬仍遵前旨由安徽一帶鈔出賊前迎剿兵貴神速萬不可稍事遷延至陸建瀛兼轄三省前曾具奏有力爭上游之說自省城水路前赴九江已覺遲緩一切調度切須虛心集益勿涉囂張張芾蔣文慶各有守土之責亦須與陸建瀛同心合力斷不可稍存意見致失事機總之該大臣督撫等或在本境

捍禦或出鄰省應援各盡心力不分畛域自有實效朕惟知賞功
罰罪而已向榮擬調廣東水師挖罟戰船著照議飛咨葉名琛等
調撥應用陸應穀奏探報賊匪有窺伺荆襄之意該大臣等亦當
密商台湧等密爲防範將此由六百里加緊各諭令知之○諭據
向榮奏稱逆匪攻陷武昌仍於漢陽漢口搭有浮橋必須多備礮
船將浮橋焚燬方可進剿前刑部郎中盧應翔所帶礮船曾在長
沙見家河擊賊見在停泊何所總兵音德布在常德設防遊擊韓
世禧分防長沙該處距賊較遠著張亮基潘鐸飭令音德布韓世
禧於常德長沙多雇船隻率領前帶官兵前進韓世禧所帶湖南
兵數百名著飭令於長沙防城楚兵內再挑數百湊足千名以資
調遣副將鄧紹良所帶兵勇卽於岳州一帶多雇船隻並於洞庭
湖招募水摸二三百名豫備柴草硝磺等物同盧應翔船隻迅速

駛往以期合力進攻焚斷浮橋勦辦可以得手斷不可稍有遷延致誤事機向榮既命爲欽差大臣一切調度事有專責兵機貴速尤忌牽制張亮基平素辦事尙不迂緩今與向榮共事一方必須和衷共濟諒不以前在雲南曾有會同參劾向榮之奏稍有意見也貴州府武昌縣文武下落著迅速查明具奏將此由六百里加緊諭令知之○戶部遵議變通旗民交產章程一查出私買旗地免追花利一清查各項旗地劃出民地一民人呈報升科寬予限期一帶地投充等弊嚴行杜絕一應報升科地畝不准徇隱一從前典當旗地改立買契一借名私買旗地改歸買主一屯居各項旗人分別辦理一補納稅課銀兩先行解部一新升旗產科則酌中定額一新賣旗地設法稽查一奏銷考成從嚴覈定一每歲錢糧定期解部一隨地莊園准其併售一旗產歸旗照舊納糧一責

成州縣辦理分別勸懲從之○甲辰禘祭 太廟○乙巳 上御
保和殿賜朝正外藩等宴每歲皆如之○諭內閣張亮基奏查明
湖南岳州府文武弁兵下落一摺據稱岳州府知府廉昌巴陵縣
知縣胡方穀出城避賊先後因病身故等情該府縣等有守土之
責自應竭力固守效死勿去乃竟先期棄城逃避前經照准部議
分別定罪若該員等向在必當明正典刑以昭炯戒見在均已病
故著毋庸議已革參將阿克東阿已革提督博勒恭武及武昌漢
陽各文武下落並殉難家屬著該督查明迅速具奏○諭青磨楊
以增奏黃河雪後復凍請俟天融冰泮加緊進占一摺前據該河
督奏稱十二月十四日卯刻開河工次驟轉東風冰凌解泮兩壩
各進一兩占即可相機放河狀心稍慰茲據奏稱十六日夜間大
雪連宵黃河復又凍阻旋鑿旋合人力難施擬俟河冰融泮加緊

趕辦等語金門見存二十餘丈進占挂纜最關緊要卽謂大河偶凍亦須設法辦理斷無工屆垂成忽然停待之理刻下節逾立春轉瞬桃汛將至若不加緊籌辦萬一再有疏失自問當得何罪青麇本無辦工之責著卽由驛回京豐工一切事宜係楊以增查文經專責著卽迅速妥籌相機進占毋得藉口人力難施稍有延誤並著將此旨傳諭在工人員等趕緊遵辦儻再有貽誤朕惟將楊以增查文經及辦工各員從重治罪決不寬貸懍之○諭軍機大臣等昨據向榮奏籌剿情形已有旨命張亮基潘鐸飭令音德布韓世禱於常德長沙多雇船隻再挑防城楚兵數百湊足千名並令鄧紹良招募水摸二三百名同盧應翔船隻迅速駛往以爲合力進剿兼用火攻之計本日據張亮基奏籌辦湖南堵剿事宜仍以防賊回竄爲詞意在止顧湖南一省藩籬而置湖北於不

問殊屬不知緩急桂林圍解鄒鳴鶴卽以防賊回竄爲詞長沙圍解徐廣縉又以此藉口試思賊陷岳州棄而不守合股下竄見在占踞漢陽武昌搭造浮橋並擄船數百隻其勢將順流東竄已屬無疑我兵見患無船必須於上游多覓船隻豫備火具乘流駛下勦辦方可得手豈可再將有用之兵置之空閒之地雖湖南各處土匪亦應勦辦止須本省防兵酌量派撥並與紳士設團保衛自可漸就清理徐廣縉但知自衛全不以下游地方爲意朕是以將其拏問治罪專責向榮以勦賊並派鎮將帶兵應援九江等處張亮基已署理湖廣總督統轄兩省豈可再蹈徐廣縉覆轍著仍遵前旨飭令音德布韓世禧鄧紹良盧應翔等統帶兵勇船隻迅速前往湖北聽候向榮調度設有貽誤朕惟該署督是問至湖南籌辦撥兵募勇各事卽責成張亮基潘鐸會同在籍侍郎曾國藩妥

爲辦理徐廣縉見經革職拏問該署督派員解京時卽將朕前賜
欽差大臣遏必隆刀一併繳回至程裔采見准回籍軍營糧臺著
該署督卽飭司道大員認真澈辦毋稍貽誤將此由六百里諭令
知之○以許祥光爲廣西按察使

由桂平梧
鬱道遷

○是月緩征河南祥

符等十五州縣節年積欠銀米蠲減直隸隆平等七州縣被水邨
莊額賦緩征甘肅靖遠等十九州縣及隴西縣丞所屬被水旱雹
霜地方新舊額賦蠲浙江仁和等十八州縣水旱地方漕米蠲緩
江蘇上元等五十五州縣蘇州等五衛水旱莊屯新舊額賦並截
畱漕米三萬二千石賑豐沛等十州縣二衛災民口糧又截畱漕
米十萬五千石賑浙江金華等八縣災民蠲緩浙江海沙等九場
歉牧竈丁新舊額賦蠲緩湖南嘉禾等十七州縣暨岳州衛被擾
地方新舊額賦○是歲朝鮮暹羅入貢○會計天下民穀數除江

蘇湖北湖南未經冊報外直隸等省通共大小男婦三萬三千四百四十萬三千三十五名口存倉米穀二千四百二十二萬二千五百三十七石二升九合九勺